

KWIKADI MWEYÈMÈNE

DYUMVWA DYÈBÈ

WÊWÈ MWINÈ TO



Twánjì kushaalaayi biimanyine kuulu, bwa katanci kakese cyanaana mpindyewu, bwa disambila. Mbanganyi muneemu emu bàdi ne dilomba kampanda pa mwoyi wabo, bàdi baswe bwa Nzambi abènzèlèku cintu kampanda cya pabwaci mu mpungilu ewu? Twinyikaayaaku mitu yetu mpindyewu kumpala Kwende.

² Taatù wa mu Dyulu, twètù tudi—tudi cisamba cya dyèsè bwa kwikala badisangishe kaaba aka mu Dìnà dya Mukalenge Yesu, mu ditunga didishikamine mutùdi mwa kuKukuukwila bilondeshile bidì kondo keetu kaa mwoyi katwambila bwa kwenza, bwa too ne leelu ewu. Nenku nyewu tulomba, Taatù, bwa cyôci aci cyamonaku mwa kunenga. Nenku mpindyewu swaku bwa tubwelele pa dyèsè dinene ditudi naadi edi. Ne swaku twèlèku mwoyi wetu mujima mu mudimu diloolo edi, bwa kuKukuukwila, bwa bifwanyine kwambiibwa, ne: “Nzambi uvwa munkaci mwetu diloolo edi, ubenesha cisamba Cyende.” Sungilaku musuuka wònsò mujimine ùdi muneemu emu diloolo edi, Mukalenge. Ne ewu yònsò udi mutwe cimpingà, swaku bwa apingane ku nzubu wa Nzambi. Nyewu ndombela mubeedi yònsò, bwa ondopiibwe, bwa udi ne lutatu wamonaku mwa kwendela kuulu, ne bwa bampofo bamone, bampudimaci bùmvwè, bwa luumu ne butumbi bifidiibwe kùdi Yesu Kilsto munkaci mwa cisamba Cyende. Swaku bwa bishaale civulukilu cya ntanta mule, Mukalenge, bwalu tudi badisangishe ne balombe mabenesha aa mu Dìnà dya Yesu. Amen.

Sòmbàayi.

³ Mushindu kampanda anyi kansanga, mu dilwalwalwa dya ku Ramada Inn, bitu misangu yònsò bimweka anu bu ne ndi ngaalukila kwanyi kumbelu, mu mushindu kampanda, bwalu ntu mulwalwalwe muneemu emu bikole be mu mushindu wa ne nkaadi—nkaadi ngeela meeji ne bantu badi ne cya kwikala anu babange kummanya. Nenku ndi ne disanka bwa cyôci aci, bwalu ndi mulwe kupeta musumbà wa bantu mu bilaala-beenyi bya Ramada Inn ebi. Umwe wa mu Tucson ne umwe wa muneemu emu, mbadileeje baa musangeelu be kutudi, batushiila bwa twètù kwenza masangisha. Abidi adi panshi aa, mvwa mwenze disangisha dyanyi mèmè sungasunga, mu Ramada Inn

emu, ne mulongolodi wa ndongamu kayi nansha mwa kuswaku bwa mêmè kufila mfranga ya difucila nzubu awu to. Acì's ncilenga cyebe cya dikema's. Ntu mvuluka kabidi cyôci aci pântù nkosolola matunga apu, mpindyewu, aba bàdi bàdileejà bîmpè kùdi bàà mu nzubu wa Nzambi.

⁴ Mpindyewu tukaadi bapete, kubangila anu ku dyalumingu diloolo aku, anyi ku dyalumingu mu mappingaja aku, eyowa's we, bikondo bya dicyonkomoka mu Mukalenge, anyi bîndîku mêmè mupete. Ndi mupete cikondo cilenga cya dikema cya disankila mabenesha Ende, ne bwobumwe bwa Nyuma Mwîmpè ne pamwe ne cisamba Cyende.

⁵ Mêmè—mêmè ntu muswe kwikala kuvuluka, ne, tudi tukuukwila Nzambi pamwe. Wêwè udi cyambiibwa cya Nzambi, citupa cya Nzambi, paudi ulwa mwânà wa balume ne mwânà wa bakaji wa Nzambi. Ne Nzambi udi munda mwebe, muswe diswa Dyende, pawikalà wêwè muswe bwa kuMulekela ùcyènza.

⁶ Pa nanku tudi tutekemena, diloolo edi ne, muntu ne muntu neapwe mwoyi maalu adi menzeke mu matuku ende, nenku mwikàle uteeka bintu byônsò ku luseke, ne biikàle tuteeka myoyi yetu buludi mu mudimu mpindyewu; kî ng'anu bwa diloolo edi to, kadi mu mpungilu ulwâlwa awu. Kakuyi mpatà to baamin'yâmpalà bààbûngî mbadisangishe. Mêmè ndi mmona bushuwa bakwabo baa bàdi basakidiibwe diloolo edi pa cibumba cya ku cyambilu, badisangishe bwa mpungilu udi ubanga maalaba. Nenku ndi ndomba bantu bàdi kaaba aka bwa ditabuluja ditudi tufuma ku dyenza edi, ne, mu mishindu yônsò bu byôbi mwa kwenzeka, ndi njinga bwa nwashaalaku too ne pa dîbà dya mpungilu. Netwikalè ne baakudi balenga baa dikema biikalàbo balongolole. Mbifwanyine kwenzeka ne mwaneetu kampanda apange kulwa, nenku, kadi tudi naabo bûngi cyanaana biikalàpu bwa kumupingana. Ndi muswe bwa kwikala mu mpungilu yônsò mujima awu mêmè mwine, bwa kusankilaku bwobumwe ebu.

⁷ Nudi bamanye ne, tutu tubànda kuneeku eku bu bambi, ne twakula, ne tutu misangu yônsò tupeesha bantu byônsò bìdi munda mwetu abi. Mêmè ngákayiisha cyena-bwalu kampanda mûngà musangu, mwaba ùvwà Yesu mwambe ne: "Tangilaayi cilôngò cya mbata, mushindu ùdìbi kabiyi—kabiyi bikwata mudimu mukole anyi biluka to, kadi Ndi nnwambila ne Solomo mu butumbi bwende bwônsò abu kaakavwalaku bu cimwe cya ku byôbi to." Nenku mêmè ndi mujandule ne, mbata bikengela akole, muunya ne bufuku, aluke, akwate mudimu mukole, bwa kudivwijaye ùbàlakana. Kadi kàtu upetelaku dibenesha to, yêyè mwine. Udi udivungulula yêyè mwine, nenku—nenku mupici wa njila umvwa dipembu difumina kudiye aku. Lubulubulu ludi lupetela bwîci anu mu mwoyi menemene amu. Yêyè udi wabanyinangana byônsò bidiye mukwacile mudimu mukole bwa kubipeta abi. Nenku ndi ngiinyika Diyiisha dyanyi ne,

Wa Kuneemekiibwa Mukalenge Mbata, aci's cidi mu mushindu kampana cyena-bwalu cya pabwaci.

⁸ Kadi—kadi bidi ne, bambi badi badifila bôbô biine kùdi bantu, nenku dîbà adi's mbilenga bwa kwikala anu musômbe bwa—bwa kuteelejaku bakwabo. Byenze bu mùdi kupetaku kwa luuya mu kwota kwa mudilu, tudi baswe kwikala anu tusômba mwinshi mwa ludimi lwa mudilu lwa muntu ne mukwende ne kunangululaku myoyi yetu ku Evanjeeliyo udi bânà beetu baa balume bayiisha bantu awu. Nenku ndi ne kusakidila bwa dipeta dya mpunga ewu bwa kwenza cyôci aci. Nenku ndi mutwishiibwe diloolo edi . . .

⁹ Billy mmungambile ne mmwabanye twarta twa disambila, mushaale byanza bitupu. Kadi katwena bafwanyine kwenza mulongo wa babeedi kaaba aka bu byôbi bikengela kuwenza to. Nwamonu's, bivwa bikengela nwênù kupatuka kunyungulukila lwa kuntu kwaka, ne kupicila mu cibambalu kampana cya ciikàle ne mîdimà, kadi kubànda kuneeku biikàle nuwila lwà eku nunku. S'udi mufwanyine katuuta dikàsà ku cintu cyônsò naka, bwa kubwela muneemu. Nenku beena lutatu ne bikalaba bôbô's mbafwanyine kwikala mu mushindu wa mubi be, mu kwenza kwa ciine aci.

¹⁰ Kadi katwena bamanye cidi Mukalenge wetu mwa kwenza nansha. Yêyè's udi mwa kumata anu munkaci mwetu mene emu, diloolo edi, ne—ne kwondopa muntu ne muntu udi kaaba aka, disaamà dyônsò. Kaa, mêmè's ndi muswe kumona aci kutamba milongo yônsò ya babeedi yînkadiku mwenzenze kacya bandela ayi, anu—anu pa kumona budishikaminyi bwa Nzambi bumata munkaci mwa bânà Bende baa butumike. Mêmè—mêmè ntu misangu yônsò munange aci.

¹¹ Pa ciibidilu, wêwè mwikàle ne ditwangana kana dyônsò edi ne bantu, bu mùdi ditentekelangana dya byanza, bu ne ki cidi cifwanyine kwenzeka, ncyêna ngeela meeji ne bààbûngî menemene mbafwanyine kwenza cyôci aci to, ee, mbafwanyine bôbô kwamba ne: “Mwambi *kampanda-kansanga* ki uvwa muntentekele mêmè byanza, nenku, butumbi kudi Nzambi!” Dîbà adi aci cidi cifikisha bantu ku ditangila bôbô mwambi awu.

¹² Kadi bu wêwè mwa kwimana anu cyanaana kaaba aka, kuyiisha Dîyi, ne kulekela Nyuma Mwîmpè wòndope muntu ne muntu, dîbà adi mwaba awu kakuyi mpatà to cidi anu nngàsà wa Nzambi. Ne dîbà adi Nzambi ngudi wangata luumu lwônsò, butumbi. Kakwena nansha kantu kakese keetu aka bwa muntu mukwabo yônsò ewu to. Mushindu awu ngwûntù mêmè, mu wanyi mudimu wa bwambi, cidi cyenza ne nciikadi nkafika ku bantu bapitepite bûngî, amba anu . . . Mpindyewu, makeelela diloolo awu, tuvwa bateete bwa kusambidila bûngî bwônsò

butuvwa peetu mwa kukookesha abu. Kadi ditentekelangana dya byanza. . .

¹³ Pa ciibidilu mmu mēbà a diloolo, mùtù pàmwápa Nyuma Mwímpè ulwa munkaci mwetu ne ubanga kuDimwenesha, uDimanyisha munkaci mwetu. Nenku dībà adi ku cyòci aci, ngeela meeji, cidi cya bushuwa, padiYe pàmwápa mwa kwikala mu budishikaminyi, nwamonu's. Ncyèna mēmè mwa kwamba mpindyewu ne: “*Ewu* mulume, anyi *ewu* mukaji, anyi *wawa* mwānà” to, nwamonu's. Nyuma Mwímpè ngudi wenda wendakana mu nzubu emu ne wàkula ne ewu yònsò udiye muswe kwakula nende awu. Nwamonu's, aci ncidishikamine. Ne dībà adi aci cidi citwala dimanya, bwalu mmulayi wa Nzambi, ne aci cidi citwala dimanya dya Nzambi udi mudishikamine, ne cidi kabidi cituulula Bwikadi Bwende munkaci mwetu. S'bivwa bikengela twètù kucimona ne kucyonkomoka's! Nenku nansha byòbi ne. . .

¹⁴ Wèwè udi wamba ne: “Ee, mēmè mvwa mupete bulema ku cyanza. Mvwa muye kuntwaku makeelela diloolo awu. Ncyèna—ncyèna—ncyèna muumvwe anu dishiilangana diine to.” Aci kaciyena cipetangana ne cyòci aci to. Bwebe wèwè, kukaadi kumane kujika. Kwèna wèwè utangila cyanza cyebe aci dībà adi to, udi utangila mulayi kampanda, wamonu's. Nenku ki bwa cinyi, kwèna mwa kwamba ne: “Ee, Mwaneetu *Kampanda* kavwa musambile disambila dya diitabuuja, anyi bikampanda ne bikansanga” to. Bwikadi bwa Mukalenge mbudi bukupeshe diitabuuja, udi umona's, ne dībà adi Yèyè ngudi mutume Diyì Dyende ne mubòndope.

¹⁵ Mpindyewu, makeelela diloolo mvwa—mvwa munyangakaje cyakabidi mulayi wanyi. Bwa diloolo edi kaayi nēnteetè bwa kushaala mukwateku cya bushuwa, mēmè ne mushindu. Nenku mpindyewu muntu kampanda nyawu wāmbì ne: “Kuvwa mushaale mu cyena-bwalu cyebe makeelela diloolo to.” To, ncivwa—ncivwa mushaalemu to; bwalu, nēnnwāmbilè ne mbwa cinyi. Mvwa muswe kuyiisha pa cyena-bwalu kampanda, mpindyewu nyewu ngāpù mwoyi ne civwa ncinyi ciine aci: *Kadi Nzambi Mubanjì Mu Luse*.

¹⁶ Nenku ki mēmè kuditwa mu dyumvwija mushindu wùvwà Pòlò, pavwaye wakula mwaba awu, mwambe ne: “Twètù bàvwà mu bikondo bya kale,” musangu kampanda, mungà musangu mushiilangane ne mpindyewu, “bàvwà bafwe, ne mu mpekaatu ne mu matomboka; bàdi Nzambi mufuululule, muvwije ne mwoyi.” Mpindyewu, nwamonu's, kumpala kwa nì ncinyi nì ncinyi kufuululudiibwaci, bidi bikengela kwikaleku cintu kampanda mwaba awu cya kufuululudiibwa ku cyòci. Neya bushuwa.

¹⁷ Pa nanku, nudi numona's, pùikalàbi ne wèwè uvwa mu didyànjlila-kumanya dya Nzambi, dībà adi udi wenda ushaala

citupa cya Nzambi. Ne mushindu umwepele wûdi mwa kwikala mwânà wa balume wa Nzambi anyi mwânà wa bakaji wa Nzambi, bivwa bikengela bwa wêwè kwikala citupa cya Nzambi, ne Nzambi kî mmujima paudi wêwè kuyiku to. Bikengela biikalè nanku. Ncya bushuwa, bwalu kudi Mushimi anu umwepele, umwepele wa Mwoyi wa Cyendelele, ne wôwò awu n’Nzambi, ne anu Yêyè nkaayende ngudi ne Mwoyi wa Cyendelele. Nwamonu anyi? Mpindyewu, nenku wêwè uvwa citupa Cyende, mu mushindu wa ne udi cyambiibwa, anyi mu meeji Ende ku cibangidilu. Ne cyôci aci, bwalu Yêyè wakeela meeji bwebe wêwè ku cibangidilu, ki cîdi cifila kaadikokiibwa kakese kudi Ye. Cyôci aci ki cîdi cikengelà kufuululudiibwa. Bamwe baa ku bôbò abu kabaadyakufuululudiibwaku to; kabeenaku naaci to, kwajiki.

¹⁸ Mbyenze anu mûdi wela ditungù dya ditala mu buloba, kadiyi ne . . . Nansha diikalè dilenga dya bishi, dyôdi kadiyiku ne mutoloku wa mwoyi munda mwâdi amu to, kadyena mwa kufuululudiibwaku to. Kadi bikengela bwa mutoloku wa mwoyi wânji kwikalamu dyambedi.

¹⁹ Nenku ntu ne kaabwalu kakese kaa mukanku awu aku, wendakana ne bikuka ne twânà twa nzoolo bwalu bavwa bawutooye ne mulediibwe mwômò amu, kadi kawuvwa udyumvwaku menemene mùvwà tuzoolo atu tudyumvwa to. Nenku, nudi bamanye’s, pààkalwà mamwâwù ne pààkeelàye lubila, yêyè’s wakumvwa díyi dya dyumvwika mu maci bilenga bya dikema bwawu wôwò, bwalu, vulukaayi ne, yêyè uvwa mukanku, kacya anu kwine kwônsò aku. Bivwa bikengela anu bwa wôwò kufika ku didipetulula, kupeta kaaba kaawu.

²⁰ Mushindu awu ki udi mwena kwitabuuja yônsò ewu. Wêwè kwakalediibwa bwa buloba ebu nansha. Wâkafûkiibwa mu cimfwanyi cya Nzambi, bwa kwikala mwânà wa Nzambi. Nenku kwêna wa mu lupangu lwa nzoolo lûdi pambelu apa elu to. Wêwè udi mukanku.

²¹ Nenku nudi bamanye’s, ki mêmè kubwela mu bwalu bwa “mukanku” awu nciciyi wa ntwa cyakabidi makàsà panshi to, ki pa nanku mêmè kwangata anu . . . Mêmè kuya biyiidi, ki mêmè kupwa mwoyi cyena-bwalu cyanyi, ne mêmè kujimija tubeji twanyi tûmvwà mufundile maalu ne bikwabo byônsò. Mwawa mpicila mu cikondo cya bwalu bukole. Kadi civwa ncyôci aci, civwa anu pa “mukanku” awu.

²² Mpindyewu Mukanku awu, Nzambi! Nudi bamanye’s, Nzambi ùtu ufwanyikija bapofeta Bende ne mikanku. Ne Yêyè utu uDibiikila ne mMukanku; Yêyè n’Yehowah Mukanku, Papa Mukanku.

²³ Kabidi kabingila kadiYe wenzela ciine aci, mukanku utu mwa kubuuka kuya muulu mule kutamba nyuunyi naka yônsò udiku ewu, ne bwalu yêyè mmwenza bishiilangane ne nyuunyi mukwabo kana yônsò ewu. Mpindyewu, yêyè kâtu wibakila

dyende diswa panshi pa buloba mùtù nzoolo ne bikwabo byònsò byenza amu to, kadi yêyè utu uya muulu bwa kwibakaye dyende diswa.

²⁴ Ne cintu cikwabo, neya ne, yêyè utu nyuunyi mwibaka mushindu wa pabwawu. Mpindyewu kabemba, anyi cikololo, anyi kabangu-nyuunyi, anyi nyuunyi mukwabo kana yònsò ewu yêyè—yêyè anu mudidinge mumulonde muulu mu maulu amu, s'mmufwanyine kusunsuluka; yêyè kî mmwenjiibwe bwa aci to. Bikengela ne, yêyè ikàle muntu wa pabwende bwa kubàndayè muulu mwamwa. Ende masala àtu mashimate bikole kutamba a nyuunyi mukwabo kana yònsò ewu.

²⁵ Ne—ne dyende dîsù nditwe kutamba dya nyuunyi mukwabo kana yònsò. Ne yêyè padiye utamba kutumbuka muulu, ki padiye utamba kumona kule. Ee, yimwe ya ku nyuunyi ayi, pakaadiyi yikafika mu butumbuke budiyi ne cya kufika amu, yidi yishaala mpofo anu mùdì kapulukusu amu. Ne mushindu awu ki ùdìbi bwa...Ee, padibo bashiyangana ne twitabaayi awu, kabeena bamanya cintu nansha cimwe pa bìdì biCitangila to. “Matuku a bishima akaadi mamane kupita,” bwa cinyi? Kabeena mwa kuCimonaku to.

²⁶ Kadi mikanku yôyì yidi mwa kubwela mu maulu, ne maulu a Dyulu muulu mwamwa. Bidi ne dikwacisha kaayi bwa kubànda muulu Mwamwa pìikalàbi ne kwênà mwa kumona? Kaa, mêmè's ndi ne disanka dinene bwa kwikala umwe wabo, ne kwikala muswikakane ne diswa dijima dya twânà twa mikanku mpindyewu.

²⁷ Tubuululaayi mu Dipungila Dikulukulu, mu Mukanda wa Nsumwinu, wakafundabo kudi Solomo, umwe wa ku bantu batambe kwikala baa lungenyi pa buloba, pa kuumusha Mukalenge wetu Yesu. Kadi Yêyè kavwa anu menemene bu Solomo to, mu mushindu wa ne Solomo uvwa muntu mulela kudi mukaji ne ùvwa mulediibwe kùdì taatù wa pa buloba, Davidi. Kadi Yesu uvwa Mwânà mulela kudi virgo, ne kavwa muntu mu kaabujima nansha; kadi Yêyè uvwa Nzambi, Muntu-Nzambi, ne Ùvwa mutambe ne muntu, Ùvwa Muntu, kadi kupita apu. Nwamonu anyi? Kadi Solomo yêyè uvwa muntu anu bu wêwè awu ne mêmè kunu, kadi kulombaye Nzambi lungenyi, bwa kulombolaye bukalenge bwende. Nenku ùvwa ne dipà dya lungenyi, muntu mutambe kwikala wa meeji matwe utùkaadiku bapete pa kuumusha Mukalenge wetu. Wàkafùnda Nsumwinu, ne mêmè ndi ngeela meeji ne yìtu milenga ya kacya.

²⁸ Nenku netubuululaayi mpindyewu mu Mukanda wa Nsumwinu, nshapita 1, ne, anyi nshapita mwi2's we, ne ndambu wa mvensa ya ntwadijilu ya Nsumwinu ayi, ya 2, kubangila ku 1. Nsumwinu 2, kubangila ku 1, ntungunukilu wa mibelu yìvwà Solomo ubela naayi bânà bende baa balume ne: “Mwanaanyi wa balume, bu wêwè mwa kwakidila . . .” Mfwilaayiku luse.

29 Mmu Nsumwinu 3.1. Mfwilaayiku luse. Nyewu ngātàngidi pa—pa kakanda kaanyi apa, ne nyewu mmona ne n’Nsumwinu 3 pamutu paa 1 anyi 2. Mfwilaayiku luse. Nsumwinu 3.1.

*Mwanaanyi wa balume, kupu mwoyi mikenji yanyi to,
kadi mwoyi webe ulame mêyì aanyi;*

*Bwalu bule bwa matuku, ne mwoyi wa bukwăpànu
mule, ne ditalala, nebìikalè . . . ne bikusakiidiibwe.*

*Luse ne bulelela kabikuumùkùku to; ubiswike
munshingu mwebe, ubifunde pa mabwe a mwoyi webe:*

*Mushindu awu neusangane dikwanyishila ne
dyumvwa dîmpè ku mèsù kwa Nzambi ne kwa bantu.*

*Wikalè mweyemene MUKALENGE ne mwoyi webe
wônsò, ne kwikadi mweyemene dyumvwa dyebe wèwè
mwine to.*

*Mu yebe njila yônsò umwitabe yêyè, nenku yêyè
neakululamijile kajila keebe.*

30 Kaa, ngeela meeji ne awu ki Mufundu udi mutambe kwikala mulenga’s! Mpindyewu ndi muswe kwangata bu cyena-bwalu, mu—mu mvensa mwi5 amu ne: *Kwikadi Mweyèmène Dyumvwa Dyèbè Wèwè Mwinè To.*

31 Mpindyewu eci ncyena—ncyena-bwalu cya pabwaci anu cya menemene eci bwa dituku ditudi ne mwoyi edi, bwalu ncyena bushuwa ne leelu wa Ndaaya ewu badi basuminyina pa dilonga dya tulaasa ne pa dyumvwa dyetu twètù biine dya maalù, dituku dya—dya dilonga dya tulaasa edi. Kadi tudi tujandula kaaba aka ne edi dîyi dya pabwadi edi, anu mùdi Mifundu mikwabo amu, didi dyòdi ne kaadi kaaba, ne tudi batwishiiibwe ne Nzambi neatufikishe ku dimona ne kiine kaaba aku kadi penyì.

32 Leelu ewu twètù tudi tutuma bânà beetu balela mu tulaasa, bwa kupetabo dyumvwa. Nenku padibo bamana kujikija tulaasa tupwekele, tudi tubatuma mu tulaasa tubândile bwa dyumvwa ditambe bwîmpè pa bìdi bitàngilà dimanya. Pashiishe padibo bajikija amu nanku, bamwe bânà bàdikù mene bôbò ne dyèsè dikumbane dya kuya ku tulaasa tutumbuke, biikàle bapicila mu tulaasa tutumbuke bwa kusheemeja dilonga dyabo ne dyumvwa dyabo pa bìdi bitangila dimanya. Cidi culômbibwà kudibo kùdi . . . Misangu yâbùngì, bwa kupeta mudimu wa dyanza, bikengela wikaleku ne dyumvwa dya mu tulaasa tubândile, anyi dilonga dya tulaasa tutumbuke, anyi bikwabo.

33 Kadi, mwena lungenyi Solomo awu mmutwămbile yêyè ne, “kubenga kucyeyemena, kubenga kweyemena dyumvwa dyetu twètù biine; kubenga kulonga bintu ebi.” Bwalu, tudi tudikonka bwa cinyi yêyè uvwa mufwanyine kwamba cintu bu cyôci eci, mbwalu pa ciibidilu dyumvwa dyetu dya cyena leelu ditu pa ciibidilu lungenyi lwa bantu, lwine lùdi lubengangane ne Dîyì dya Nzambi alu. Ndi ngeela meeji ne ki civwà Solomo uteeta

kufila bu mubelu kùdì bânà bende baa balume abu, kacivwa bwa kwikalabo bapange mukanda to, kadi mbwa kabiikadi beeyemena dyumvwa dyabo bôbò biine to.

³⁴ Ne ndi ngeela meeji ne ncifwanyine kwikala dikankamika dîmpè leelu ewu, bu twètù mwa kwambila bânà beetu balela ne bânà baa Nzambi, ne, mbîmpè bwa kwikala balonge tulaasa, kakwena cìdì cibi mu cyôci aci to; kadi pàkaadi dilonga dya tulaasa adi dibengangana ne Dîyi dya Nzambi, dîbà adi eyemena Dîyi nenku ulekele dilonga dyebe dya tulaasa adi dikebè kwa kuya diye, wamonu's, bwalu, bwa Dîyi. Bwa dilonga dya tulaasa dyôdi nedipete anu kaaba ne nedikupeteshe mudimu mwîmpè, pâmwâpa cipidì cilenga munkaci mwa beena mamanya a mu mitu, kadi, aci cidì anu cîmpè, bwalu neciikalè pâmwâpa dikwacisha dinene kùdì, cikukwacisha mu maalu ebe àdì àtangilà mpetu ne byebe—byebe bintu bìdì bikulamà ne mwoyi, cikuvwijila nsòmbelu mulengaku ndambu.

³⁵ Kadi wavuluka cintu cimwe, mwanaanyi wa balume, newikalè ne cya kufwa. Nansha wêwè mulonge tulaasa bûngì bishi, nansha wêwè mwa kuungwija nkoleshilu mulenga wa bishi, newikalè anu ne cya kukungamangana ne lufu, bwalu baakafunda, ne: “Bantu badi ne cya kufwa, ne paanyima paa cyôci aci n’Cilumbulwidi.” Nenku Nzambi, pîikalà. . . Lufu kî ndùdì lubi menemene to, kadi kupicila kwa ku Cilumbulwidi ki luseke lùdì lubi ndwôlò alu. Mpindyewu, udi mwa kufwa, “kadi paanyima paa aci n’Cilumbulwidi.” Ne Nzambi kaakukukonka ne ntulaasa bûngì kaayi tûdì mulonge paucivwa pa buloba apa, mbûngì kaayi bwa dimanya dyûdì mukungwije, bwa ne udi mupete dipolome dyebe dya Licencié anyi kwêna mupete, anyi dipolome kana dyônsò dyûdì mufwanyine kwikala mupete adi, nansha mene wêwè bu mwambi to. Kabaakukulombaci to.

³⁶ Kadi cyakukonkabo, wêwè, nciwakenza ne dyumvwa dya Dîyi dya Nzambi. Mwaba awu ki ùdì ulwa cyakukonkabo, bwalu ng’Aci. Dilonga dyebe dya tulaasa ndîmpè, kadi Dîyi dya Nzambi ki didì Mwoyi. “Dîyi Dyanyi didi Mwoyi,” ne kuDimanya ki kùdì Mwoyi. Ne Yêyè, Wàkamba ne: “Mumanyaayi Yêyè.” Yêyè udi Dîyi. Pa nanku udi mwa kuMumanya anu ku Dîyi, bwalu Yêyè udi Dîyi. Ki mushindu umwepele uwaMumanya ngwôwò awu, nku Dîyi Dyende.

³⁷ Muntu kampanda mmufwanyine kulwa ne kwamba ne, “*cikampanda* ki cidì Nzambi,” anyi ne “*cikansanga* ki cidì Nzambi,” anyi ne “*cikankenga* ki cidì Nzambi,” anyi ne “*cikampanda* ki cidì cilelela,” ne “*cikansanga* ki cidì cilelela,” kadi twètù tudi twalukila ku Dîyi, didì Bulelela adi.

³⁸ Ne Dîyi didi anu mùdì mutooto wa—wa ku Nord amu, wôwò awu ki mutooto mulelela. Nansha buloba bwikàle bùshintuluka mu mushindu kaayi, mutooto wa ku Nord awu udi anu mujaalame pankaci pamwe ne buloba. Udi wakaja kaleeji-nord

keebe bilondeshile mutooto wa ku Nord. Ùdi wòwò anu pankaci paa buloba. Mitooto mikwabo yidi yyishintuluka pamwe ne buloba, kadi mutooto wa ku Nord wòwò udi ushaala anu tendé.

³⁹ Mpindyewu kaleeji-nord n’Nyuma Mwîmpè, ne (kùdì) dyebe—dyebe dikunji dya ciswikidi ndifwanyine kwikala Mutooto wa ku Nord, pa nanku Nyuma Mwîmpè neafunkune misangu yònsò anu ku Dîyì. Nyuma Mwîmpè kaakukulombolaku ku cîngà cintu to anu ku Dîyì dya Nzambi. Pa nanku mmunyi mùdì muntu mufwanyine kwitaba twitabaayi kampana, pîikalàye ubengangana ne Dîyì, kadi pashiishe kutungunukaye ne kwamba mudiye ne Nyuma Mwîmpè? Nyuma Mwîmpè’s mmufwanyine kukufunkwina kukwabo kukuumusha ku aci. Bidi bikengela Nyuma Mwîmpè bwa kukufunkwina ku Dîyì, bwalu Yèyè udi Dîyì. Yèyè udi Dîyì, ne Dyòdì didi anu mwa . . . Bu mùdì kalonda kàdì mu kaleeji-nord aku katangile anu ku Pòle Nord, ki luseke lumwepele lùdiku mwa kukokiibwa. Nenku pàdì Nyuma Mwîmpè mwikàle Mubangi ne Mufundi, ne Muvwiji wa Dîyì ne mwoyi, mmunyi mudiYe mwa kufunkwina muntu ku cîngà cintu cidì kacìyi Dîyì?

⁴⁰ Pa nanku pàdì muntu wamba mudiye ne Nyuma Mwîmpè, kadi witabuujà cintu kampana cya cibengangana ne Dîyì, bidi bileeja ne kî n’Nyuma Mwîmpè mushuwashuwale udiye nende awu to. Nwamonu anyi? Ncifwanyine kwikala mukishi kampana, mèmè ncyèna mufwanyine kukokangana pa ciine aci to, kadi kî—kî n’Nyuma Mwîmpè wa Kilisto awu to. Mpindyewu, nudi bamanye’s, misangu mivule, bàtu bangatangana nyuma muntu ne mukwende; nenku aci’s ncifwanyine kufunkuna, bu mùdì cisumbu cya bantu, ku cintu kampana, kadi cyôci—cyôci kacyakufunkunaku kùdì Kilisto to. Kadi Nyuma Mwîmpè ùtu misangu yònsò ufunkuna anu kùdì Kilisto, ne Kilisto udi Dîyì.

⁴¹ Tudi tumona cyôci eci bitooke tòò mu Bible. Anyi, mèmè ngudi mucimone’s. Pàmwàpa ndi mufwanyine kwikala mutupakane, kadi, mu wanyi ngeelelu wa meeji, ncyèna ngeela meeji nanku to; bwalu, aci, cya ne: “Kwikadi mweyemene dyumvwa dyebe wèwè mwine dya maalu to.” Wèwè mweyemene dyumvwa dyebe wèwè mwine, dîbà adi udi ne cya kulaluka kuumuka mu njila mulelela. Kwèna mwa kweyemena dyumvwa dya muntu mikwabo nansha yèyè nganyi to, pakaadibi ne mbwalu bwa Mwoyi. Bwa kupeta Mwoyi, bikengela weyemene Dîyì. Dyòdì adi ki Mwoyi.

⁴² Tudi tumona cyôci eci, kacya anu ku cibangidilu. Mbatumanyisheci anu bitooke tòò, kacya anu ku cibangidilu ne, Nzambi wakapeesha dîkù Dyende dya kumpala pa buloba Dîyì Dyende, bwa bòbò kwikadilaku ne mwoyi. Anu Dîyì Dyende nkaayaadi, ki dîvwà dîkèngelà kwikadilaku ne mwoyi. Mpindyewu, aci kî nku didya dya byakudya, ne bikwabo to. Kadi Dîyì Dyende ndivwà dîkèngelà kwikadilaku ne mwoyi, Cyendelele. Nenku pàvwàbo anu kacya baalama Dîyì adi,

bavwa ne mwoyi Cyendeleele. Kadi katupa kakese kaa cyambilu kaa kumpala kaa Diyì adi kaakateekiibwa pa kaaba kaa cyanaana, munyoololo wònsò wakakoseka, ki bukwabantu kutùkinabù mu lufu. Nwamonu's, mpindyewu tudi tumona.

⁴³ Eva, kakuyi mpatà to yêyè uvwa muntu wa lungenyi awu, wa nzànzànzà wàkapàtuka ku Adama, uvwa mwànà—mwànà wa balume wa Nzambi awu, nenku Eva, cya bushuwa yêyè mwikàle usanganyiibwa mu kaaba aku mùvwà kamuyiku mpekaatu to, kamuyi kaaba bwa mpekaatu to, ncya bushuwa ne yêyè uvwa ne cya kwikala mupete mmwenenu mulenga wa dikema wa cìvwà Nzambi. Bwalu, mu mapingaja ónsò, yêyè ne bayende bavwa bendakana mu citaleela cya budimi, pa ib'a muloolo, ne bavwa bayiikila ne Nzambi cìmònààmèèsù. Ncintu kaayi cya dibula dya—dya lungenyi cìvwà muntu uvwa wendakana ne Nzambi cìmònààmèèsù, ku dituku ne ku dituku, kadi pashiishe mufwanyine kukudimukila ku dilukakaja dya lungenyi dya cintu kampanda cyàkamufikishà ku dilukakaja lungenyi kadi kumuumusha ku Dìyi dya Nzambi!

⁴⁴ Twètù's tucidi ne baa nanku awu. Buumushiibwa ku Dìyi dya Nzambi ku dilukakaja dya lungenyi anu bipeepele nunku, paanyima paa bamane kwikala basómbe mu Bwikadi bwa Nzambi. Bamaona Dìyi dya Nzambi dìyiishiibwa, Dìyi dya Nzambi dimweneshiibwa, baakanwayi ne bangènzàmpèkààtù balwa ku cyoshelu ne bakudimunyiibwa micima ne bavwijiibwa bifukiibwa bipyabipyu mu Kilisto, bantu baa luumu lubi bavwijiibwa bainàbànzà ne balume bakalanga; kadi pashiishe kukudimuka ne kushiya Cintu cibeneshiibwe cìvwà cibalombole cibafikishe ku Mwoyi ewu aci, kadi pashiishe kunyangakajiibwa bwa kulonda twitabaayi wa mushindu kampanda, bwa kushaala batambe kumanyika anyi—anyi kubwela mu cyabiikilabo ne nkasumbu katambe bwìmpè kaa bantu aci.

⁴⁵ Mona's, wêwè's udi mu kasumbu kàdi katambe bwìmpè kàdiku: kaa bânà baa balume ne baa bakaji baa Nzambi. Ee, mêmè ntu muswe abu bulunda kutamba bwa kwikala ne bamfumu ne balombodi baa makookeshi maalabale, ne bikwabo byònsò. Mpèèshè mêmè musùmbà wa bantu badipwekeshe awu, piikalàbo kabayi bamanye mwa kusunguluja diboko dyabo dya dyabalume ne dya dyabakaji! Bu mudibo anu bamanye Nzambi, ne baMunange ne baMukwacila mudimu, abu ki bantu bamanyike bikole baa mu Dyulu, bwanyi mêmè. Eyowa's, mukalenge!

⁴⁶ Mpindyewu, kadi tudi tusangana ne Eva wakatwishiibwa kùdi Sataana anu bipeepele pèèpèlèè, bwa kuumuka ku Dìyi dya Nzambi, ki yêyè kweyemena dyumvwa dyende yêyè mwine, bwalu Sataana uvwa mumukupile cintu kampanda cìvwà kaciyi dyumvwa dilelela dya Nzambi divwaye yêyè naadi to. Kadi wàkapeta cintu cya cyanaana cyakamwambilabo kudi mwena lukuna awu, Sataana, ki pende kuciitabaye.

47 Mpindyewu tudi tusangana bipeta bya cyôci eci: cyàkatùkija bukwabantu bwônsò nkòong mu lufu, bwalu maamù wa kumpala pa buloba, wàkeeyemena dyumvwa dyende yêyè mwine, diikàle dibengangana ne Dîyi dya Nzambi, ki kutùkijayè bukwabantu bwônsò nkòong mu lufu. Mpindyewu nwènù nudi nwitabuujà aci anyi? [Disangisha didi dyamba ne: “Amen.”—Muf.] Kadi’s ki Dîyi ndyôdì adi. Ee, mukaji yêyè ùtu misangu yônsò. . .

48 Ekeleeziya, mu Bible, uvwa mufwanyikija ne mukaji. Ne ekeleeziya leelu wa Ndaaya ewu udi mwa kwitaba dintamfu dya mêyi maswika ne twitabaayi, ne kutùkija disangisha dyônsò nkòong mu ditapuluka ne Nzambi. Bantu biine bàdì biitaba biine bintu abi abu, pamutu paa Dîyi dya Nzambi, badi menemene anu bu Eva. Ne ciine aci ncyenjiibwe misangu ne misangu, too ne mukaadibo balwe kutùkija lukongo elu lwônsò nkòong kulumusha ku Dîyi dya Nzambi.

49 Ne pààmwèneshiibwà Dîyi, pààbuludiibwà Dîyi, bôbò kabaakuDiitabaku to, bwalu kabaakucyenzaku to, bwalu bôbò mbeeyemene dyumvwa dyabo bôbò biine. “Ekeleeziya ewu wakaashiibwa kaaba aka. Nkaaba kalenga kaa dikema. Mbulongolodi bunene. Ncidimba cya musumbà munene wa bantu. Bwa cinyi butudi katuyi mwa kwikala bàà mwômò amu? Mêmè nêmmweyèmènè.” Kweyemenyi dyumvwa dyebe wêwè mwine to, kadi ikala mweyemene Dîyi dya Mukalenge!

50 Mpindyewu—mpindyewu byakajikila’s, ndekeelu wa byônsò, mu lufu bwa bukwabantu bwônsò nkòong, bu mungãmbi, bya mwomumwe ne mpindyewu, ngambila bantu bàabũngi bàdì beeyemene dyumvwa dyabo bôbò biine, mêyi abo maswika ne twitabaayi, ne bikwabo, balaka mukana bamba ne: “Dîyi dya Nzambi kî ndilelela dyônsò to, ndambu wa Dyôdì adi mmusonsola kadi ndambu mukwabo kî mmusonsola to.” Mmunyi munudi mwa kwikala ne diitabuujà mu Bible kampana, piikalà citupa Cyende ciikàle cisonsola ne cikwabo kaciyi cisonsola? Piikalàbi ne dimwepele, piikalàbi ne dîyi dyamba dimwepele ndya mafi, dîbà adi cintu cyônsò mu kaabujima’s ncifwanyine kwikala cya mafi. Bikengela cyônsò ciikàle cya bushuwa, cya bushwa anu menemene.

51 Nenu bimwe bya ku bilongelu bya Bible bya ku dîna, bikònyangaja ebi, bilongesha dimanya dya bantu, didikungwija, mudibo badisangisha ne bàsòmba mu nsangilu wa bantu, bamba ne: “Mpindyewu tangilaayi, bwa matuku a bishima, akamana kujika mu matuku a bapostolo.” Ne bantu bàabũngi bàdì mu bukookeshi bwa mwepiskopo anyi bwa bantu baa myânzù mitumbuke abu, mbafwanyine kusòmba mwaba awu bamba ne: “Ee, bu mêmè mwa kutwa ku cyende, kakuyi mpatà to ndi mufwanyine kwikala ewu wâlonda bwa kwangata kaaba kende.” Nwamonu’s, dîbà adi’s udi mweyemene dyumvwa dyebe wêwè mwine, pamutu paa kwikala mwimane ne makàsà abidi bwa

kutwa ku cya Dìyì dya Nzambi. Ki cidi cikakeba maalu ònsò aa ncyòci aci.

⁵² Kukaadi cikondo kampanda, muntu kampanda...Mvwa nsanganyibwa mu dikokangana pa cilumbu cya citadi. Ki kungambilabo, bamba ne: “Mona’s, balubuludi beebe’s badi anu bantu baudi wenzeja maalu, ngeela meeji.”

⁵³ Mémè kwamba ne: “Bu mémè ne mulubuludi mu kasumbu kaabo amu, mwikàle ne mmwenenu mushiilangane, kadi kayi muswe kwimana (Udi ubwamba awu nansha mwikàle nganyi) bwa kwamba patooke mmwenenu wende yêyè mwine pa bwalu abu to, ndi mufwanyine kuumusha mu kasumbu aku.” Eyowa’s, mukalenge. Nansha cyòci cibengangana ne dyanyi diitabuuja pa bwalu abu, ndi mémè muswe bwa yêyè àmbè patooke cidiye yêyè wela meeji ne ki cilelela aci. Ki cîndi mumuteekele mwaba awu ncyòci aci, bwa mmone cidiye yêyè wamba pa bwalu abu. Kadi ki citudi twètù naaci ncyòci aci.

⁵⁴ Monaayi ne, Yesu mmwambe, mu Yone Munsantu 10 ne: “Mikooko Yanyi mmimanye Dìyì dya mukana Mwanyi.” Dìyì dya mukana, mu bushuwa bwa bwalu, n’Dìyì Dyende, padiYe wakula apu. “Mikooko Yanyi mmimanye Dìyì dya mukana Mwanyi. Dìyì dya mukana Mwanyi ndijaadikiibwe kudiye ne, ndilelela. Ndishindikiibwe ne n’Dìyì dya mukana Mwanyi.” Mpindyewu, mpindyewu monaayi, yôyi kayeena ne cya kulonda dîyì dikwabo kana dyònsò nansha. Kayaakulondaku to. “Mikooko Yanyi mmimanye Dìyì dya mukana Mwanyi, ne yôyi kayaakulondaku mwenyi to.” Mu ngaakwilu mukwabo, kayaakuumvwaku dîyì dya cyena teoloji didi dilongeshà bibengangane ne Dìyì to. Mikooko kayeena yumvwa aci to anu mùdibi ne mukanku, makeelela diloolo, kawuvwa mufwanyine kuumvwa mwadi wa cyokò-cyokò wa nzoolo wa cikuka awu to. Wòwò kawena wuwumvwa to, bwalu wòwò mmukanku. Nenu ncintu cimwecimwe aci kùdi mwànà wa Nzambi mulelela mulediibwe cyakabidi, udi umvwa yêyè anu maalu àdi a Nzambi.

⁵⁵ Mpindyewu muntu kampanda udi wamba ne: “Ee, mpindyewu tangila, udi mufwanyine kwenza *cikampanda’s*, ngeela meeji. S’cidi, mémè ndi ngiitabuuja ne kacyna mushindu *kampanda* to. Mémè ndi ngiitabuuja ne matuku a bishima akaadi mamane kupita. Ncyèna ngiitabuuja ne aci ndyondopa dya kudi Nzambi to. Ncyèna ngiitabuuja Eci to.” Mpindyewu mwena Kilisto mulelela mulediibwe cyakabidi, aci kacyakukwacikaku mu ende maci to, kèna ucyumvwaku yêyè to nansha kakese. Mene muntu udi witabuuja Nzambi, ne mwikàle mwa kubala Bible ne kumona ne Yêyè udi umwèumwè awu makeelela, leelu, too ne kashidi, mmunyi mwitabaye cintu bu nanku’s, mémè ncyèna ncyumvwaku to.

Pa nanku, bôbô kabeena beeyemena dyumvwa dyabo bôbô biine to.

⁵⁶ Bidi anu bu mùdì mwânà wa—wa mu diboko. Angata mwânà wa mu diboko, alediibwe ne eyemene mu cyâdi cya mamwëndè musangu umwe cyanaana, umwamwa, mabeele a luuya, mweyemeje katù kende kakese aku mu cyâdi cyende, nansha mucidiye anu ne mēbà makese cyanaana amu. Munda mwa dituku dimwe anyi abidi kuumukila pa dībà adi, umuumushe kùdì mamwëndè awu kadi umufile mu cyâdi cya maamù wa bende, yêyè's neasube tukolo atu utwela muulu ne dipaasalala dya ne mwadi. Kî mmamwëndè to. Nwamonu's, yêyè ukaadi mumane kupeta cintu kampanda pa bidi bimutangila, bwalu yêyè udi citupa cya maamù ewu, kabidi bufuki bukaadi bumupetele mushindu wa kumanya mamwëndè wende yêyè.

⁵⁷ Nanku piikalàbi ne bufuki mbupetele mwânà wa mu diboko mushindu wa kumanyaye mamwëndè, mwena munda mudiye mulediibwe awu, ambaayaaku tũng mwapangaye kupetela, mwânà wa Nzambi udi mulediibwe ku Nyuma wa Nzambi, yêyè mmumanye Mamwëndè. Mmumanye, bwalu mmulediibwe ku Dîyì, ne yêyè udi umvwa Dîyì. Wêwè mumuteeke mu mwaba mwenyi, ncyà bushuwa ne yêyè kaakudyumvwaku bu udi mu—mu mwaba wende to, neapatukemu ne lukasa lwônsò. Bwalu yêyè udi ne, kēna weyemena . . .

Muntu kampanda udi wamba ne: “Mpindyewu anji indilabi tũng, munanga wanyi, bwa mpindyewu's ewu ki mamwēbè.”

⁵⁸ Kî mmamwëndè nansha, bwalu yêyè udi ne mushindu wa kumanya mudiye citupa cya maamù ewu. Ki mamwëndè nyêyè awu, mukwabo nansha umwe kēna mwa kwangataku kaaba kende to. Yêyè mmumanye mamwëndè wende yêyè. Monaayi, mmunyi, mushindu mwine udibi nanku bulelela's we. Nzambi mmufuke cintu ne cintu bilondeshile mushindu waci.

⁵⁹ Ngombe bilondeshile mushindu wàyi. Misangu yàbúngì mu kukungwija kwa ngombe, tuvwa mwa kusaka bisumbu bijima bya ngombe ne twânà tukese twa ngombe, mvwa anu ngenza kudikonka ne mmunyi muvwatu mwa kumanya baamamwätù sungasunga. Mpindyewu, pààyì, yivwa yipatuka yenda yipweka mikuna, ngombe yônsò ayi misambakane. Ngombe udi—udi—udi ne kânà awu, pâmwapà kânà kaa ngombe kàdì ne nzala yàbúngì aku's nkafwanyine kuya kaamwakù ndambu maamù wa cyanaana, piikalàku ne nzala yamba kukashebeya; kadi patuvwa tuyiimanyika, mwamwa mu mpàtà, maamù awu uvwa ukosolola mu musumbà wa ngombe ne twânà twa ngombe amu too ne pavwaye ukapeta kende kânà sungasunga, ne kânà pààkù kavwa kanyeemena ku dikeba dya wakù mamwākù. Yêyè mmumanye kaamwadi kakese aku ne kôkò nkamanye disàmà dya maamù adi. Nanku yêyè udi usàma ubiikila kânà aku, ne baamaamù bakwabo bàdì bàsàma mu mushindu wa wêwè kuciya mwa

kudyumvwa wêwè mwine paudi wela meeji to, kadi kânà kakese aku nekapete dibiikila disunguluke dya mamwâkù adi, bwalu kôkò kadi citupa cya maamù awu.

⁶⁰ Ne mwena Kilisto mulediibwe cyakabidi ku Dyulu, yêyè udi citupa cya Dìyì edi. Cya bushuwa. Bwa maamù wa cyanaana yêyè kaakumulondaku to. Yêyè udi citupa cya Dìyì. Udi yêyè ushaala ne Dìyì. “Piikalà mpungi upatula mwadi mulubidile, udi mwa kudilongolola ku mvita nganyi?” mwàkambà Pòlò. Yêyè mmumanye mwadi wa Dìyì. Monaayi mùdi—mùdi eci nunku, cyanza cidyanjila-kulongolola cya Nzambi cyenda cibalonda too ne ku ndekeelu. Yêyè mmumanye ne ùkaavwa mudyànjila-kulongolola, ùvwa mu Bulelela bwa Evanjeeliyo. Yêyè uvwa mumanye ne yêyè uvwa mulediibwe ku Nyuma wa Nzambi. Mmumanye ne Nyuma wa Nzambi kèna mwa kuvilaku Dìyì dya Nzambi nansha, ki bwa cinyi kaakulondaku mwenyi to. Monaayi mùdi . . .

⁶¹ Mvwa mupingaje mèsù mwaba ewu pa kantu kâmvwà mufunde pa kabeji mwaba ewu. Mvwa—mvwa mukâpite ku luseke, kadi nyewu mfuma ku dimona dibala dya Mufundu, ki mêmè kudyambidila ne ndi mufwanyine kupinganyina cyakabidi ku kôkò. Tangilaayi numone mùvwà mikooko Yende Yêyè mwine midyanjila-kulongolola miMulonde, mu matuku mene a beena teoloji baa batambe bunene baa kacya twâpeta abu. Yôyi yakapatukamu buludi, bwalu yivwa miMumanye. Yivwa mimanye civwà Dìyì dilaye bwa diine dituku adi. Yivwa mimanye civwà Maasiya ne cya kwikala mufwanangane naaci paakalwaYe. Ki Simona Peetelo kulwaye kudiYe, ùvwa anu “Simona” cyanaana mwine musangu awu.

⁶² Nenku Andele nguvwa muteete kumwambila bwalu abu. “Muntu ewu m’Maasiya.” Ee, Simona, mu bushuwa bwa bwalu, ùvwa pâmwâpa mupape mutu ndambu, ne kayi muswe kuya to.

⁶³ Kadi mmwenze anu usemena mu Bwikadi bwa Yesu, paakamba Yesu ne: “Dînà dyebe n’Simona, ne udi mwânà wa Yona.” Mpindyewu tutu bamanye ne Yesu wakambila bapostolo Bende ne Yêyè ukaavwa mubamanye, ne yêyè, “kumpala kwa difuka dya dyulu ne buloba.” Bavwa byambiibwa bya meeji Ende. Ki bwa cinyi, bu muvwabi ne dimiinu adi divwa diteekiibwe munda mwende, ne bu muvwaye mumanye ne Dìyì dikaavwa dyambe ne bikaavwa bimane kulayiibwa ne Maasiya neikalè muprofeta, nenku paakamonaye aci, kulekelaye bya diloba mishipa abi. Wâkamanya dîbà adi ne ùvwa mwa kwimansha makondo ende awu, bwalu ùvwa mwa kuya—kuya kashaala mulobi wa bantu. Bwalu . . .

⁶⁴ Mpindyewu, kuvwa bakwabo bàvwà biimane mwaba awu, bàâkamònà cintu cimwecimwe aci cyenjiibwe, kadi bacinyike bôbô ne “nyuma mubi.” Abu bavwa mbeena teoloji, bwalu kacivwa mu mmwenenu wa dilongesha dyabo dya cyena teoloji

to. Ki bôbò kucidyombola, bwalu bavwa beeyemene dyumvwa dyabo bôbò biine, dya kùdi balongeshi baabo; pààbi, Yesu Kilisto's wakalwa mu dyuja dya Dîyi dya mulayi, kadi bôbò bavwa batambe kufofoma bwa kucimonabo. Bavwa beeyemene bôbò bivwà baakwidi bambe, ne bashindameene pa bivwà ekeleeziya mwambe, pamutu paa pa civwà Nzambi mwambe.

⁶⁵ Mpindyewu Yesu kubadyulaye bwa ciine aci. Yêyè kwamba ne: “Kenketaayi Mifundu, bwalu mu Yôyi amu mmunudi nulaka mukana nwamba ne nudi ne Mwoyi wa Cyendelele. Kadi Yôyi ayi's ki Yidi yimfidila Mêmè bujaadiki. Mifundu yîndi Mêmè nnulomba bwa kukenketa eyi, Yôyi's ki yidi yinwambila ne Mêmè ndi Nganyi.”

⁶⁶ Kadi kabavwa baswe kweyemena civwà Dîyi dyambe to, kadi bavwa beeyemene civwà dyabo dyumvwa. Bavwa bôbò beeyemene dyumvwa dyabo bôbò biine. Nenku Mifundu yidi yitwambila ne bavwa bababwikile kwîsù. Cibwikilu cya teoloji wabo bôbò biine ki civwà cibafomije.

Wêwè udi wamba ne: “Mwaneetu Branham, kûkaadi ukuupuka aku ki kwêpi?”

⁶⁷ Kûndi anu muswe kuupuka nkwôkò eku. Cintu aci cidid munkaci mwa kwenzeka cyakabidi, mu mushindu wa ne, balume ne bakaji ne bantu nebiikalè beeyemene ekeleeziya kampanda kukaadibo bakashaale beenamù, kabayi bacyuka cidi Dîyi dya Nzambi dyambe bwa cyôci aci to. Badi anu kacya baatungunuka ne cyôci aci, beeyemene dyumvwa dyabo bôbò biine, kadi biikalè kabayi bacyuka Dîyi dya Nzambi, byenze bu ne (kacya) Dyôdi kadituku dyanji kufundiibwa. Ndimiinu dya mwoyi wa buntu ditù kadiyi ditolweshiibwe to. Didi ne mwoyi wa mubidi ewu, kadi kadiyi ne mwoyi wa nyuma munda mwadi bwa wôwô kufuululudiibwa to. Cibwikilu civwa pa mpala yabo.

⁶⁸ Mpindyewu monaayi, bavwa ne meji abo bôbò a civwà cikengela Nzambi kwikalaYe, bavwa ne mmwenenu yabo bôbò ya civwà cikengela Maasiya kwikalaYe. Kadi Dîyi's dikaavwa dyambe civwà cikengela Maasiya kwikalaYe! Mpindyewu, nwamonu's, bavwa ne dyumvwa dyabo bôbò dya civwaYe mwa kwikala. Kakuyi mpatà to mwakwidi munene wakamba ne: “Baakwidi baanyi bônso bàdi kwînshi kwanyi abu, mpindyewu paalwa Maasiya . . . Tudi biibake ntempelu munene mwaba ewu. Tudi benze byônso ebi. Ne Bible mmwambe ne: ‘Yêyè nealwe lubilu ku ntempelu Wende,’ ne bintu byônso ebi. PenzaYe aci, PaalwaYe, Maasiya nealwe buludi apa ne neaDimanyishe kutudi twêtù, wamba ne: ‘Ki Mêmè Maasiya ewu. Nyewu ngaafiki. Ki Mêmè ewu Maasiya unuvwa anu bindilendile awu.’” Ee, paakalwaYe mu bulelela, Yêyè wakalwa mu mushindu mushiilangane menemene ne wüvwâbo bôbò badyelela meeji ne ki wôwô awu, kabaakaMujingulula to. Kabaakamanya ne Yêyè uvwa Nganyi to. Kadi Bende . . .

69 Kaa, bu ne...kadi bu cyena lubombo cikwabo cilwe mwaba awu kwamba ne: “Ki mèmè Maasiya ewu. Ndi Docteur *Kampanda*”? Nunku’s mbiitabuuje ciine aci.

70 Kadi paudi ulwa kùdì Muntu udi mulela ku dilediibwa ne luumu lubi lwenda luMulonda, kayiku ne dilonga dya kalaasa dya mu cilongelu nansha cimwe civwayeYeku mubwele kacya, bwa kulonga, kakuyiku seminere uvwaYe nende, kayi ne karta kaa buumambala nansha kamwe; kadi Yêyè uvwa dyumvwija dya Dìyì dya Nzambi, dimweneshiibwe. “Byenzedi, bìndì Mèmè ngenza, ki bìdì binwambila ne Mèmè ndi Nganyi. Pìikalàbì ne Mèmè ncyèna ngenza byenzedi bìvwà bilayiibwe ne Nèngènzè to, dîbà adi kanuNgiitabuuji to.”

71 Nenku katwenaku mwa kwangata cyôcì aci bwa dituku edi anyi? Pàdì Nyuma Mwîmpè ulwa, cidibo baswe kwangata bwa cikondo kampanda cikwabo, padiYe ulwa mu cyenzedi ne dileeja dya patooke dya bukole Bwende bwa Mwoyi wa Cyendelele, bantu mbaswe kuciinyika ne—ne “dikolesha dya maalu dya cisuku.” Bwa cinyi? Mbeeyemene dyumvwa dyabo bôbô biine, kî n’Diyì dya Mukalenge nansha. S’nudi bamanye ne aci ncyà bushuwa.

72 Dimanyishiibwa, didyumvwijila dya Yêyè mwine dya Nzambi, ki dimwenesha dya mulayi.

73 Pàmwâpa nêncyâmbè, ncitookesha bikole ndambu. Pàdì Nzambi wakula Dìyì, Yêyè kèna dijinga dya muntu kampanda mulume anyi mukaji, anyi nî nganyi mukwabo, bwa kwambaye cìdì Aci cyumvwija nansha. PaakambaYe ne...Ee, wêwè udi wamba ne: “Nzambi uvwa muswe kwamba *cikampanda*.” Nzambi mmuswe kwamba anu cidìYe wamba ne ncidìYe muswe kwamba aci. Nwamonu anyi?

74 Mpindyewu Yêyè udi umvwija Dìyì Dyende Yêyè mwine munyi? Mu kuDyuja. Bible wakamba ne: “Virgo neimite difu,” yêyè kwimita. Aci kacyna cikengela dyumvwija kampanda nansha dimwe to. Nzambi wakamba ne: “Bukênkè bwikalèku,” ne bwakiikalaku. Aci kacyna cikengela dyumvwija kampanda nansha dimwe to.

75 Nzambi wakamba, kabidi, mu matuku a ndekeelu aa ne Yêyè neapongolole Nyuma Mwîmpè Wende pa musunya wônsò, ne Yêyè mmucyènzè. Aci kacyna cikengela dyumvwija kampanda nansha dimwe to. Aci cidì cikengela anu dicitaba, muntu kampanda bwa kwitaba cìdì Nzambi mwenze. Kacyna cikengela dyumvwija kampanda to. Nzambi udi umvwija Dìyì Dyende Yêyè mwine. Nzambi wakalaya bintu bitudi tumona ku dituku ne ku dituku ebi, ne, Yêyè neàbyènzè mu dituku dya ndekeelu.

76 Bantu leelu ewu, anu muvwabi mwine musangu awu amu, badi beeyemena dyumvwa dyabo bôbô biine. “Mpaasata wanyi

udi wamba ne ‘ndikolesha dya maalu.’” Kadi’s Bible mmwambe ne necyenzeke. Wèwè neweyemene dyumvwa dya nganyi?

⁷⁷ Bible mmulaye mu matuku a ndekeelu, ne, Cikondo cya Ekeleeziya wa Laodikiya necilwe cibanzi cya dikema, ne necilwe mu didikumbanyin- . . . anyi ne, mu didikumbanyina dyabo bôbô biine ne: “Ndi mubanzi. Ncyèna dijinga ne cintu to. Ndi musômbe bu mukalenge-mukaji.” Ne yèyè mwine’s mmubanzi. Ne Yèyè mmwambe ne: “Kwèna mumanye ne udi mwena dikenga to.” Mpindyewu ncikondo cya ekeleeziya mu kaabujima, ekeleeziya! “Kudi ekeleeziya wa Laodikiya ne: ‘Udi butaka, mpofo, mupele, mwena dikenga, kadi kwèna mucimanye to.’” Musômbe ne mubanzi ende, binunu dikumi misangu binunu dikumi, ne binunu bya bidimba, mubanzi a buloba bujima mu cyanza cyende, pamwe ne ônsò. Ônsò masanga, leelu wa Ndaaya ewu, ne ekeleeziya wa Katolike ne beena Mishòonyi, bônsò pamwe, bu mukaadibo bendela pamwe emu, bôbô’s badi ne mubanzi a buloba bujima.

⁷⁸ Twètù’s tudi bacyome mu ditunga edi, bambe ne kutwa cinù panshi. Tudi tusomba mu mfranga ya bitadi biikalà ne cya kufuciibwa mu bidimu makumi anaayi kuumukila ku mpindyewu, mudibo bangambila, mudibo bambe mu *Life Line*. Bitadi, byena mfranga yitudi munkaci mwa kutuula mpindyewu eyi abi, mbiikalàbo mwa kufucisha mu bidimu makumi anaayi kuumukila ku mpindyewu. Mwikulwanyani mukese wa balume ewu, bu Yesu mwa kunenga, bitadi byafutaye paakumbajaye bidimu makumi anaayi abi, ki byena mfranga yitudi munkaci mwa kutuula mpindyewu abi. Tuyitùma bwa kwambulwisha matunga a ku baabèndè, pàdi ba-Indiens beetu twètù ne bakwabo biikalà bafwa ne nzala; tuteeta kusumba bulunda. Bulunda kabatu bàbùsùmba to. Mulunda kabatu bàmusùmba to. To, kadi ki citudi twètù munkaci mwa kwenza’s. Mushindu awu ki utudi bateekiibwe, kufucisha bantu bitadi ku kantu ne kantu kadibo mwa kupeta aku, citadi, citadi, citadi. Ne katwakupatukaku mu mabanza a mvita to munda mwa—mwa nkama ya bidimu yicidiku eyi, mùndi ncinka, mudibo batubweje kùdi beena cididi emu. Kadi mpindyewu kabivwaku bikengela bwa twètù kwikala mushindu awu nansha. Kakwenaku kabingila nansha kamwe bwa twètù kwikala mushindu awu to.

⁷⁹ Kadi ekeleeziya, yôyì miine, yikaadi milwe mibanji. “Cibwîpî menemene ne mubanzi a buloba bujima,” mùdi Bible wamba, “adi asanganyiibwa mu ekeleeziya wa Katolike.” Ki bwa cinyi Russie mmuumwipate, ki bwa cinyi Russie mmumuushe mu bwobumwe nende. Aci ki civwà muji mwine wa communisme, bwalu ekeleeziya wakalongesha muvwaye cintu kampanda, kakuyi ciine cya nsongo cipite bakwabo baa pa buloba nansha.

⁸⁰ Patuvwa mu Finlande mwamwa, mwânà wa balume mutekete awu wakabiishiibwa ku bafwe. Ki basalaayi baa

beena Russie bàba biimane basulame, kwambabo ne: “Twêtù netwakidile Nzambi udi mwa kubiisha bafwe.”

⁸¹ Twêtù tudi benze mangumba, ne bilongelu ne—ne bitanda, kadi kupangila mwa kwenza cyàkatwàmbilâ Yesu bwa twêtù kwenza, civwa “Kuyiisha Evanjeeliyo.” Tudi twêtù bateete bwa kulongesha baa pa buloba tulaasa. Yêyè kaakambaku ne: “Nulongeshe baa pa buloba tulaasa; ewu yônsò wâlônga kalaasa neasungidiibwe” to. Bidi bikengela bwa wêwè kulediibwa cyakabidi, kuujibwa tente ne Nyuma. Ki bwa cinyi tudi bapangile badye ne butu, myaba yônsò. Nwamonu’s, tudi bapete mabanji, tudi bapete cintu ciine.

⁸² Mpindyewu ciikalâ mwa kwenzeka ncinyi? Kadi piikalâ ekeleeziya ewu, Nsangilu wa Maeeleeziya wa Buloba bujima ewu, mwa kwendela pamwe, kanwenaayiku mwa kumona ne wîkala mwa kulombolangana nganyi anyi? Nwênù ba-Méthodistes ne ba-Presbytériens kanwenaayiku mwa kuumvwa ciine aci anyi, bakwabo baa kunudi, nansha too ne beena Mpenta mene? Nwênù nyawu nwamba munwabenga bwa kubwelamu. Anyi nenubwelemu anyi nenwîkalè ne cya kuupula dingumba dyenu adi. Nenwenzè anyi eci anyi eci. Ncyaci cidî anu kumpala kwenu menemene, bikengela anu nwênù bacyenzè. Ndyenzejangana dya ku bukole, cimanyinu cya nyama wa lwonji. Nenku ki cyôci aci, menemene. Kakuyi mpatâ to cyena mangumba (mêmè ndi mwa kucijaadika ne Bible) ncimanyinu cya nyama wa lwonji. “Yêyè awu uvwa mmukaji wa masandi; ùvwa ne bânâ baa bakaji bandumba.” Ne tudi bamanye ne aci m’Mbulelela. Ntendeleelu mudilongolwela, cidî cibengangana ne Diyî, ne ncifwilakanyi ne Kilisto mu mêyi aci makulu. Kî mbwena kwamba ne byônsò bidîmu mbifwilakanyi ne Kilisto to; kadi mu mêyi àci makulu, ndongolwelu waci awu ngudi mufwilakanyi ne Kilisto, bwalu udi ubengangana ne Diyî dya Nzambi. Ndongolwelu yônsò udi mudilongolwela udi mushindu awu.

⁸³ S’ki bwalu abu, nwamonu’s, nudi beeyemene dyumvwa dya muntu mukwab-. . . dyumvwa dyende yêyè, pamutu paa nwênù kweyemena dyumvwa dya Nzambi, ku cidî Nzambi mwambe bwa cyôci aci. Ki cidî cyènza ne ciikalè cibi. Nsongaalume yidi yiya ku maaseminere àdî àfila dilonga dîmpè dya kalaasa, baya ku bilongelu bya Bible ebi, bya ku dînâ’s. Ne pâmwâpa badi ne—badi ne dibiikila dya kùdî Nzambi mu mwoyi wabo. Kadi dya bapatukamu nenku biikâlè ne mitu mipaya tente ne mmwenenu umwe, wa ne: “*Kampanda* ngwâkacyâmba, Mwepiskopo *Kansanga*. *Kankenga* ngwâkacyâmba. *Kampanda* awu ngwâkacyâmba. Nsangilu wa bantu’s mmupunge diyî ne, bivwa bikengela kwikalaci mushindu *kampanda*.”

⁸⁴ Wêwè kucyuku cidî nî nganyi nî nganyi wamba to! Yesu mmwambe ne: “Diyî dya muntu yônsò diikalè mashimi, kadi

Dyanyi Mémè diikalè Bulelela! Nansha dyôdi diikàle dya nganyi, Dyanyi diikalè Bulelela!”

⁸⁵ Mpindyewu mmunyi mutudi tumanya cidi Bulelela? Padi Bible wamba ne cintu kampana necyenzeke, ne cintu kampana necyenzeke, pàaci cyenzeka mushindu awu.

⁸⁶ Mpindyewu, Bible mmwambe ne: “Munda mwende muvwa mabanji a—a buloba bujima”: ngòlò, argent.

⁸⁷ Mpindyewu piikalàbi ne twètù tudi pa cipiminu cya ngòlò, ne biikàle bacyome, mpindyewu ciikalà mwa kwenzeka ncinyi? Ciikalà mwa kwenzeka ncinyi? Nudi bamanye’s, babanji baa ditunga edi, byapu binene ebi, ne benji baa wiski ne benji baa mfwanka, ne bikwabo bya mushindu awu, kabaakutwala bwa kushintula lupetu to, pa nanku cintu cimwepele cidi cikengela bwa twètù kwenza nkusomba mfranga ayi. Kadi kudi mwaba anu umwepele utudi mwa kuyisomba. Ne patudi tuyisomba, tudi tusumbishila bwanaabuta bwetu ku cyôci aci. Neya bushuwa. Dibà adi cinwikalà mwa kwenza ncinyi? S’nwashaadi cintu cya cyôci aci, ndongolwelu awu. Kakwena cintu cikwabo nansha cimwe to, cinudiku mwa kwenza.

⁸⁸ Kaa, balumyana, kanwikadi nwela meeji ne ndi... Nudi mwa kwela meeji ne ndi mupâlè. Kadi dyapuwishabo anu diyi dyanyi edi kudi lufu, mikaba ya mēyi eyi neyitungunuke anu ne kwediibwa, nenku nenujingulule ne cidi mwambe aci ncyenzeke. Ndi mufwanyine kwikala muntu wa mutambe kukutakana bwa kwangata kaaba kandi mwangate bwa kwimana aka, bwa kubangangana mene ne ciine cintu eci, ndi—ndi mufwanyine kwikala—ndi mufwanyine kwikala mbengangana ne Nzambi, ndi mufwanyine kwikala mbengangana ne cyônsò cidi ciikàle Nzambi, bu byôbi ne mémè (bu byôbi ne mvwa ne) mutupakane mu ngeelelu wanyi wa meeji ne mu dibiikidiibwa dyanyi. Cintu aci nunku ncifwanyine kwikala cibangangane ne Nzambi. Kadi ndi mwangate kaaba kaanyi aka bwalu ndi nkàmòna mwaba ewu mu Diyi. N’Diyi dya Nzambi. Pashiishe ndi ncimona cishindikiibwe, cijaadikiibwe ne m’Bulelela. Ki dyumvwija ndyôdi adi didi Nzambi ufila dya Diyi Dyende. Dyumvwija dya Nzambi Yêyè mwine dya Diyi Dyende mmushindu udiYe uDishindika ne uDivwija dilelela.

⁸⁹ Bafaalesa aba bavwa bampofu bwa cinyi? Cyakabàvwijà bampofu menemene aci ncinganyi? Bwalu kabavwa baswe kwitaba dibuulula anyi dishindikiibwa dya Diyi to.

⁹⁰ Nenku ki bwa cinyi leelu wa Ndaaya ewu ekeleeziya yidi mpofu, mbwalu ki mmiswe kwitaba dibuulula didi munkaci mwa kushindikiibwa to. Piikalà Diyi dyamba nanku, ne ciikàle cibuuuludiibwa, ne pashiishe cijaadikiibwa, kadi kabayi anu baCiitaba to.

91 Ki bwa cinyi beena Yuda aba, beena Yuda too ne leelu ewu, kî mbaswe to. Kwêna mwa kubambila bwa Kilisto to, bwalu cibwikilu cîcîdi anu pa mpala yabo, bafofomijiibwe.

92 Ne ekeleeziya, kwêna mwa kubambila bwa Evanjeeliyo mu kaabujima ne bwa bukole bwa Nzambi to, bwalu nzambi wa buloba ebw ukaadi mubafofomije bwa kabamonu malelela a Nzambi to, nenku mbeeyemene dyumvwa dyabo bôbô biine. Pâdi bakaji babwela mu ekeleeziya ne babebula nsuki yabo, s'mbwalu bampaasata baabo badi babambila ne: “Kaa, s'bidi anu bîmpè. Muntu awu mmupâle.” Kadi's Bible ngudi mwambe ne mmwenze bibi padiye ucyenza apu, Nzambi ùtu mubenge bwa kwandamuna ku disambila dyende. Ne bamwe bakaji badi benza cintu cikwabo cya bundu, ùteeta bwa kwikala muyiishi, dîbà adi yêyè's wênjî bintu bibidi. Bible mmwambe ne kabivwa bikengela bwa kwenzaye cyôci aci to, nansha cimwe cya ku cyôci aci. Kadi bulongolodi bwa ekeleeziya nebùcîtàbè, bumujidila mu mudimu awu ne bumutuma uya. Badi beeyemena dyumvwa dyabo bôbô biine!

93 Dîyi dya Nzambi dimwepele ditèèka pa kaaba kaa cyanaana, anyi dyumvwija bibi, anyi Dyôdi kadiyi diitabiibwe to, cidi cikosa Munyoololo wônsò nkòong. “Muntu kaakwikala ne mwoyi anu bwa dyâmpà nkaayaadi to, kadi ku Dîyi dyônsò didi dipatuka mukana mwa Nzambi.”

94 Bwa cinyi mùdîbi ne, nwênù bakaji, nudi nungumvwa nyiisha mbenga bintu ebi, bya divwala dya tuputululu, ne bilaabu bya kwîsù, ne—ne bya myòdelè ya nsuki mibebula ebi, ne bintakanyi bya mishindu yônsò abi, kadi cidimu cyônsò pândî ngaalukila nudi basòmbè anu mu ngiikadilu umwèumwè awu? S'mbwalu nudi beeyemene dyumvwa dyenu nwênù biine pamutu paa Dîyi dya Mukalenge.

95 Kabidi, nwênù bampaasata, bwa cinyi kanuyiku nusukula ekeleeziya wenu? S'mbwalu nuyaaya ku twitabaayi yenu ya cyena mangumba ayi pamutu paa Dîyi dya Mukalenge. Cya bushuwa's. Kanwikadi nweyemena dyumvwa dyenu nwênù biine to. Ee, kanwikadi nweyemena dyumvwa dyenu nwênù biine to, kadi eyemenaayi Dîyi dya Mukalenge.

96 Kî mbafwanyine kuciitaba to, bwalu kî mbafwanyine kwitaba dishindika to. Yesu wakalwa ne Evanjeeliyo kampanda—kampanda, menemene anu mwakambaYe ne Yêyè nealwe amu. Nansha mene misangu yâbûngî. . .

97 Yone wakapeta cibwejàkàjî ndambu paakeedibwaye mu buloko, nenku yêyè—yêyè wakapweka kuntwaku. . . Kadi pende's ùkaavwa muyiishe ne “Kuvwa kulwa Maasiya, Yêyè uvwa ne cipeepudi mu cyanza Cyende; Yêyè uvwa mwa kukezula cishiipwilu Cyende cyônsò nkòong, ne kwosha bisote ne kapyà kâdî kakayi mwa kujimiibwa, ne kukungwija blé mu diyeeba.” Nyuma wa Nzambi mwikàle upatuka, ùfukuka

munda Mwende cyenze bu—cyenze bu mushimi. Ki pashiishe paakalwaye kumona Yesu umata mu cyalu, Muntu mukese, mupole, wa mushindu mupwekele mwikàle wa basaka eku ne eku, unyeemena *apa*, bwa kusungila mwoyi Wende, ne *kwaka*. Mona's, bôbô kabavwa . . .

⁹⁸ Yone kavwa mwa kucyumvwaku to, pa nanku ki kutumaye bamwe baa ku bayiidi bende bwa kuya kajandwila kùdi Yesu aku ne Ûvwa cya bushuwa Yêyè awu anyi. Ndipwekeshiibwa dya milongo kaayi edi bwa Yesu! Paanyima paa muprofeta awu mumane kwimana mu mâyi, ne Dîyi dya Nzambi, mwambe ne: “Mvwa muMumanye, bwalu mvwa mumone kùdi—kùdi Nyuma Mwîmpè, mwenze bu nyuunyi wa nkuci, Nzambi utuuluka mu Dyulu mwenze bu nyuunyi wa nkuci ne ubwela munda Mwende, ne mêmè kuumvwa Dîyi difumina mu Dyulu, dyamba ne: ‘Ewu m’Mwan’Aanyi munanga,’” kadi pashiishe Yone kwambaye ne: “Ndaayi, nuMukonkebi ne Ûdi cya bushuwa Yêyè awu anyi, anyi—anyi—anyi—anyi twindile mukwabo?”

⁹⁹ Mpindyewu Yesu kaakamutuminaku mukanda kampanda wa kumona mwa kuditwala bîmpè mu buloko, anyi wa ne bivwa bikengela kwikala wa mu ekeleeziya kampanda to. Kadi Yêyè wakamba ne: “Anji shaalaayi mwaba awu katanci kakese bwa nutangile bidî byenzekà, nenku pashiishe nuye kaleeja Yone bintu binwikalà bamone byenjiibwe abi,” bwalu byenzedi Byende bivwaYe wenza bivwa bishindika ne Yêyè ki uvwa Maasiya awu, Mwânà wa Nzambi. “Dyakalenga didi kùdi ewu udi kayi ulendwishiibwa bwanyi Mêmè.”

¹⁰⁰ Bâàbûngî menemene bakaadi balendwishiibwe. Bantu bâàbûngî bâtu balendwishiibwa anu bipeepele nunku bwa Dîyi dya Nzambi. Dyôdi—Dyôdi ndibengangane, bôbô mbaswe kweyemena dyumvwa dyabo bôbô biine. Kî mbaswe kwangata Dîyi dya Mukalenge to. Nenku bikengela bôbô kwikalabo benda anu mushindu uvwabo—uvwabo balongeshiibwe bwa kwenda awu. Ne mushindu mwine wûtùbo balongeshiibwe awu, ki ùdi ekeleeziya wabo mweyemene's. Nansha byôbi ne Nzambi mmulaye ne Yêyè—Yêyè nealokeshe mvula, kupeta mvula mu dinda, kadi ekeleeziya mwambe ne “aci ndukutukutu,” bôbô mbafwanyine kwitabuujja ekeleeziya pamutu paa Nzambi. Mbwa cinyi abu? Mbaleidiibwe kùdi ekeleeziya.

¹⁰¹ Kadi muntu udi mulediibwe kùdi Nzambi, ngwa ku Dimiinu dya Nzambi. Ne Dimiinu dya Nzambi n’Dîyi dya Nzambi, ne yêyè udi ne mwoyi anu ku Dyôdi adi. Dyôdi adi ki wende Mwoyi.

¹⁰² Mpindyewu, bôbô bavwa beeyemene dyumvwa dyabo bôbô biine, kadi kabavwa baswe kweyemena Dîyi dya Nzambi to. Bôbô's bavwa bamanye civwà bwalu. Civwa mu Mifundu. Bôbô baakaciinyika ne “nyuma mubi,” Muntu awu's. Mbwa cinyi abu? Mwakwidi wabo wakamba ne: “Muntu yônsô wadidinga

anu kuya kateeleja Muntu ewu uyiisha awu, neipaciibwe mu nsunàngòngà.”

¹⁰³ Musangu kampana wàkondopiibwà muntu uvwa mpofo awu, kùdì Yesu, nansha baledi bende mene, pààbò basanke bikole bwa dyondopiibwa adi, kadi baakaciina bwa kujikula ne Yesu ngwâkacyènza. Eyowa’s.

Yèyè kwamba—yèyè kwamba ne: “Ewu mmwaneenu mulela anyi?”

Bôbò ne: “Eyowa.”

Yèyè ne: “Udi mumwondope nganyi?”

¹⁰⁴ Bôbò ne: “Ncyêna—ncyêna mumanye bwalà.” Yèyè ne: “Yèyè ukaadi mukole, mukonke yèyè. Yèyè, s’ùdi mwa kudyakwila.”

¹⁰⁵ Bwalu, bakaavwa bambe, ne: “Muntu yònsò wâMweyemena awu, dyumvwa dya Kilisto,” pamutu paa dyumvwa dyabo bôbò, “ùvwa mwa kwipaciibwa mu ekeleeziya wabo.” Mpindyewu aci kî ncintu anu cimwecimwe aci anyi? S’nnwênù bândi ngeela lukonko lwa buludi abu. [Disangisha didi dyamba ne: “Amen.”—Muf.] Ncya bushuwa. S’ncizole cintu anu cyôci cimwecimwe aci. Cidì Nzambi wenza nansha ciikàle cinyi, bidì bikengela ciikalè anu bilondeshile dyumvwa dyabo bôbò, kacyi cidì Nzambi ushindika ne ki Bulelela aci to. Mpindyewu, nansha nanku, muntu awu uvwa yèyè ne dyandamuna.

Awu ne: “Udi mukwondope nganyi?”

Yèyè ne: “Udibo babiikila ne n’Yesu wa mu Nazaleeta awu.”

Awu ne: “S’ngngènzàmpèkààtù. Twètù katwena bamanye kudiYe mufumine to.”

¹⁰⁶ Yèyè ne: “Mpindyewu abu bwalu’s bwakolu. Nwênù aba bàdì ne cya kwikala balombodi baa dîbà edi. Kadi’s ki Muntu ewu muntabeeje mèsù, cintu citù kaciyikù cyanji kwenzeka kacya dyulu ne buloba byabanga to, kadi nwênù nudi nwamba munudi kanuyi bamanye kudiYe mufumine.” Kaa, ekelekele!

¹⁰⁷ Bwa cinyi? Bavwa beeyemene dyumvwa dyabo bôbò biine pamutu paa Dìyì dya Mukalenge. Bwalu Yeshaayi wakamba ne: “Bampofo nebamone, balema nebatupike bu kashà kalume, bipeela nebitudike ne disanka.” Kadi nudi numona ne bôbò bavwa beeyemene dyumvwa dyabo bôbò biine, kabayi beeyemene Dìyì to; ndongolwelu wabo bôbò biine uvwabo badyènzèle’s.

¹⁰⁸ Mpindyewu, monaayi ekeleeziya ya leelu ewu eyi mudiyi yenza cintu cimwecimwe aci. Bakaadi benze cisa cya dyumvwa ditambidile, mu ndongolwelu yabo ya cyena mangumba ayi. Nenku, badi ne dyumvwa dya ditambidile dya dikema, mu mushindu wa kabayi baswe muntu nansha umwe ubwelakanamu to, bwa muntu nansha umwe kabwelakanyimu to piikalaye kayi wa mu cisumbu aci.

109 Kanungambidiku to; mêmè ntu musòmbèle mu Tucson, mu Arizona. Ndi mulwemu kukaadi bidimu bisatu, mvwa mudisangishe ne nsangilu wa maekleeziya, kadi mêmè kwamba ne: “Mêmè ncyèna mulwe bwa kubanga ekeleeziya to. Ndi mulwe bwa kwikalaku neenu mu bwobumwe. Ndi mulwe bwa kunwambulwisha. Mêmè ntu mpandanjila, mutangadiki, ki cyònsò cîndi ngenza ncyôci aci.”

Bòbò ne: “Udi mulwe muneemu bwa kubanga ekeleeziya anyi?”

110 Mêmè ne: “To, mukalenge. Ndi mulwe muneemu. . . Mêmè dijinga ne ekeleeziya, ndi nende mu Indiana.” Mêmè ne: “Ndi mulwe muneemu bwalu Mukalenge mmundombole mu cikeena-kumona bwa kulwa muneemu. Nënshaalè bwa cikondo kampana mpindyewu, amba anu Yèyè mundombole bwa kuumuka kuya, kadi ncyènàku mulwe bwa kubanga ekeleeziya to. Ndi mulwe mbwà kunwambulwisha nwènù bânà beetu.”

111 Aci kukaadi bidimu bisatu. Ncítukù mubiikiidiibwe ku mwaba nansha umwe to. Bwa cinyi? Bwalu kwakenzeka cisangilu anu paanyima menemene paa cyôci aci, e kwambabo ne, muntu yèyè anu mudidinge mumpicishe mu cyambilu cyende, bavwa mwa kutentemuna muyiishi awu. Nwamonu anyi? Bwa cinyi? Beeyemene dyumvwa dyabo bòbò biine! Cya bushuwa’s, abu’s mbaa ku dîna, badi badyenzela dyabo dyumvwa dya ditambe kutumbuka.

112 Wèwè kuyi mufundishe dîna dyebe mu mukanda wabo bòbò awu to, wèwè’s newikalè. . . udi mujimine. Mwambi kampana ngwàkangambila cyôci aci. “Kaa,” mùdi wèwè wamba, “awu’s uvwa ngwa mu matalà’s.” S’uvwa mwena Mpenta.

113 Jack Moore ne mêmè tuvwa basòmbèle mwaba awu munkaci mwa kumuteeleja mu Dallas, Texas. Yèyè kwamba ne nebikengele bwa yèyè kukupulaku anu muntu kampana mu mukanda.

Mêmè kwamba ne: “Bwa cinyi?”

“Bwalu mmubwele mu dyumvwangana neebe.”

Mêmè ne: “Ee, dikùpùlâku’s.”

Yèyè ne: “Ee, dîbà adi yèyè’s mmujimine.”

Mêmè ne: “Mujimine?”

“Mona’s,” mwakambaye, “dîna dyende dyôdi kadiyimu to!”

114 Mêmè ne: “Wamba mùdi mukulu wa distriki kadi watabuuja ciine aci amba’s?”

Yèyè ne: “S’ki bulelela mbwòbù abu.”

115 Mêmè ne: “Kosa telefone awu, mukalenge. Wèwè, wèwè. . . Aci kí nngàsà wa Nzambi nansha, aci—aci, wamonu’s.”

116 “Bwalu ku Nyuma umwe tudi bònsò babatijiibwe mu Mubidi umwe, ne balwe bidimba bya Mubidi awu.” Nansha

cimanyinu cyûdi wêwè naaci pambidi peebe ciikàle cya bishi, aci kaciyena ne bwalu ne cyôci aci to. Kakuyi mpatà to wêwè udi mwena Kilisto nku Dilediibwa. Ki mushindu umwepele ngwôwò awu, mushindu umwepele wûdiku mwa kwikala; kî nku dikashaala mwena cikampanda to, kî nku twitabaayi to, kî nku disalula dya *cikampanda*, anyi ku dyambulula dya *cikansanga*, anyi ku cintu cikwabo nî ncyà bishi, anyi ku tulaasa tulonga, anyi ku teoloji to. Wêwè udi mwena Kilisto mpaudi ulediibwa cyakabidi, ne kwêna mwa kulediibwa cyakabidi paudi kuyi musungudiibwe bwa kulediibwa cyakabidi to. “Bwalu muntu nansha umwe kêna mwa kulwa kûNdi pîikalà Taatù Wanyi kayi mumukoke to, ne bônso bàdi Taatù Wanyi muMpeeshe nebalwe.” Amen. “Même nêmmubiishè ku lufu ku dituku dya ndekeelu.”

117 Bilongelu bya Bible bya ku dîna bitudi naabi ebi, nebyâmbè, nebyeyemene dilonga dyabi byôbi biine. Kaa, ekelekele. Bôbò abu, nansha cidi Dîyi dyamba ciikàle cinyi, bôbò badi mwa kucyumvwija kucitookesha, kaa, biikàle bumvwijangana bôbò nkaayaabo, baciitabuujjangana munkaci mwabo, ne bantu baa mushindu wabo bôbò abu baciitabuuja, ne: “Matuku a bishima akaadi mamane kupita. Cintu pàaci ne mmuprofeta, baprofeta, ne bapostolo kacitukù to. Cintu pàaci ne mmapà a dyondopa kacitukù to, ne bikwabo. Byônso abi byakamana kujika anu kale kwônso aku mu matuku a Bible.” Bôbò nkaayaabu badi mwa kwitabuujjangana aci.

118 Nudi bamanye ne, Bible mmwambe ne: “Udi mwa kwitabuuja dishima ne kupiishiibwa ku dyôdi.” Nwamonu’s, aci m’Bulelela bwa menemene. Badi benza, cidi Dîyi dya Nzambi dyamba nansha ciikàle cinganyi, badi beeyemena dyumvwa dyabo bôbò biine. Bôbò, badi beeyemena dyôdi adi, badiitabuuja, beela meeji ne didi Bulelela. Udi mwa kutungunuka ne kwitabuuja dishima, misangu ne misangu ne misangu, too ne mwashaaladi Bulelela kûdi wêwè. Aci’s ncyà bushuwa.

119 Kadi mmunyi mutudi twêtù tumanya ne m’Bulelela anyi kî mbwôbò? Nzambi udi ujaadika ne m’Bulelela, bwalu budi mu Dîyi Dyende ne Yêyè mwikàle uDishindika. Yêyè udi wenza dyumvwija Dyende Yêyè mwine dya Dyôdi adi.

120 Bôbò badi benza bishi, bwa kufika too ne ku ciine eci? Badi bacyenza ku nkoleshilu wabo mulenga, dilonga dyabo dya tulaasa, ku mishindu yabo ya dyumvwa dya ku—ku dipolome dyabo dya docteur, ne bikwabo, bwa ne mbafumine ku seminere kampanda ne mbalonge byôbi bintu ebi.

121 Kadi tangilaayi, nwênù balunda, teejejaayi. Kaaba nansha kamwe mu Bible katwena balombiibwe bwa kuumvwa to. Katwena balombiibwe bwa kuCyumvwa to. Tudi balombiibwe bwa kuCiitabuuja. KuCiitabuuja ku cinyi? Ku diitabuuja. Wêwè uCyumvwa, dîbà adi aci’s cyavwiji diitabuuja cyanaana. Kwêna

mwa kuCyumvwa to, kadi udi uCiitabuuja nansha bya munyi. Bu ne mvwa mwa kuumvwa Nzambi, nunku kabivwa bikengela bwa mêmè kwitabuuja Nzambi to. Mêmè ncyêna ngumvwa Nzambi to. Muntu nansha umwe kêna umvwa Nzambi to. Ncyêna mwa kuumvwa Dîyi dya Nzambi to, kadi ndi nDiitaba. Ndi n'Diitabuuja. Ncyêna mulombiibwe bwa kuDyumvwa to.

¹²² To, ncitu muye ku seminere nansha umwe ne ku dyumvwa dyônsò dinene dya dimanya dya muntu pa Cyôci aci to. Ndi mêmè mumanye anu ne Bible mmwambe Cyôci aci ne: “Yesu Kilisto udi umwèumwè awu makeelela, leelu, too ne kashidi,” ne ndi mMukeba mu mushindu umweumwe awu. Ndi mumanye ne Yêyè wakalaya civwaYe mwa kwenza mu dituku edi, ndi nkeba bwa Yêyè kucyenza ne Yêyè udi ucyenza. Ncya bushuwa. Yêyè wakalaya ngâsâ, mêmè kumukeba e kumupeta. Yêyè wakalaya dyondopa, ndi ndiitabuuja ne ndi mudîtâbe, ne ndi mudipete.

¹²³ Mpindyewu ncyêna muswe kunwangata dîbâ dyenu dipitepite bûngî to, kadi ndi muswe kunulombaku cintu cimwepele panwikalâ baswe kuntwalaku bwa kasunsa kamwe, bwa mêmè kwangataku bamwe baa ku bàvwâ kabayi beeyemene dyumvwa dyabo bôbô biine abu; bamwe bantu baa mu Bible, anu bakese cyanaana, bàvwâ kabayi beeyemene dyumvwa dyabo bôbô biine abu, nansha mùvwâ dyumvwa dya cikondo cyabo diikâlè cinyi.

¹²⁴ Twangataayi, cileejelu, Noa. Noa uvwa ne mwoyi mu cikondo cya bukebikébi bunene bwa maalu a mamanya. Mu matuku a Noa, pâmwâpa bavwa biibaka nzubu ya bipaapu bya misaka, bidîbo kabayiku mwa kwenzulula to. Mpindyewu katwena ne cintu nansha cimwe cya kwenza naaci biine abi to, cintu nansha cimwe cya kujuula naaci mabwe manenaanaale awu bwa kuâbândisha kuulu kwaka. Kî mbafwanyineku kucyenza to, leelu ewu. Mu matuku awu, bavwa ne mushindâ wa mushindu kampanda uvwabo beela mu mpenci bwa kuvwija bilâmbâ byangata mmwenekelu wa mu bufuki too ne leelu ewu. Bavwa ne manga a dibenga kubola avwabo mwa kulama naawu bitalu bwa kabibolu; twêtù katwenaku bafwanyine kubyenza to, leelu ewu, bu ne bivwa bikengela bwa twêtù kubyenza. Tudi ne...mazola ne mpingu byâbûngî bitukaadi bajimije. Dituku divwaye yêyè ne mwoyi adi, muvwa mmu cikondo cya maalu a mamanya a meeji matwe.

¹²⁵ Yesu wakaciteela, ne cikondo cya mushindu umweumwe awu necyalukile cyakabidi kumpala kwa Yêyè kupingana ne: “Bwalu anu mwakadibi mu matuku a Noa.” Mpindyewu nenwitabuuje, cyôci aci, kî mmwômò anyi? Nudi nwitabuuja ne Yesu ngwâkamba aci anyi? Nudi nwitabuuja ne tukaadi baalukile ku cikondo aci anyi? Mpindyewu aci cididi mu Mukanda wa Luuka, nshapita wa 17 ku mvensa wa 29.

¹²⁶ Mpindyewu mu Luuka 17.30, Yèyè wakamba ne: “Anu mwakadibi mu matuku a Lota, mùvwà Mwanjelo wa Mukalenge . . .”

¹²⁷ Mpindyewu, Yèyè uvwa ubala anu Bible umwèumwè utudi tubala ewu. Ne pavwaYe . . . Alukilaayi paanyima nukajandule ne divwa ndituku dya mushindu kaayi divwàku kumpala kwa mvula wa Noa adi. Alukilaayi paanyima nukajandule ne divwa ndituku dya mushindu kaayi divwàku kumpala kwa buloba kubutudiibwabu mu matuku a Lota adi. Jandulaayi ne civwa ncinyi, kadi numone civwà Yesu wamba aci.

¹²⁸ “Mu matuku a Noa, bavwa badya, banwa, baselangana, ne baseleshiibwa; kabaakacimanyaku to too ne pààkabwelà Noa mu bwàtù, ne mvula yakalwa, kubapitula bônso.”

¹²⁹ Mu mtuku a Lota, kumpala menemene kwa baa pa buloba kwikalabo . . . kwa kapyà kwoshaku baa Bisamba bya bende, beena Sodoma, kuvwa babakyanganyi baa balume ne balume, maalu binyangukangane, bintu byônso pa buloba. Cinene cya . . . Civwa n’Los Angeles wa cyena leelu; kaciyi anu Los Angeles wa cyena leelu to, kadi États-Unis; kaciyi anu mu États-Unis to, kadi buloba bujima. Civwa ndinyangukangana dya maalu anu dyetu dya cya bushuwa edi! Balume bakaavwa bajimije mushimi wabo wa mwoyi wa mu bufuki ne mishindu yabo ya dyumvwa ya mu bufuki ya cyumvwilu cya ciibidilu, bashaale banyangakaja kùdi nyuma mubi wakashintulula dilongangana dijima wa mwoyi wabo wa mu bufuki, ki kwikalabo bakwata kùdi nyuma ya badémóns. Piikalà aci kaciyi cimfwanyi cya matuku a Noa to, mèmè ngudi nciyi mucimanye to, ne cya mu matuku a Lota, ki cìndì muswe kwamba. Kabidi, mu matuku a Noa, badya, banwa, baselangana, baseleshiibwa, tubàdì twa dishipa dya mabaka tûle tente, ne byônso, anu mùvwàbi menemene amu.

¹³⁰ Kadi, vulukaayi ne, kumpala kwa buloba kubutudiibwabu, Abraham wakatumiibwa pa buloba ne wakapeebwa mulayi wa mwànà wa balume. Ne Abraham ukaavwa mutuutakeene ne Nzambi mu bipidi byàbûngì, bu cimfwanyi cya ekeleeziya mutuutakeene ne Nzambi. Kadi kumpala menemene kwa kabutu ne kwa mwànà mulaya awu kwalukilaye, anyi kulwaye, eyowa’s we, mwànà wa balume uvwa mulayiibwe awu, kulwaye, Nzambi wakuuluka ne wakaDimwenesha mu mubidi wa buntu, mu muntu, bantu basatu. Ki kulwabo kùdi Lota; baakalwa dyambedi kùdi Abraham, ne bààkasòmba. Ne Abraham ukaavwa ne dînà dyende dya Abram dimana kushintulula dilwe Abraham; dya Sarai dilwe Sarah.

¹³¹ Ki Muntu ewu, Mwakudi ewu, Elohim, paakatuulukaYe bwa kwakula nende, Wàkamba cinyi? Wàkamba ne: “Mukajebe Sarah udi penyi?”

Yèyè ne: “Ûdi mu ntenta, paanyima Peebe apu.”

132 Yèyè ne: “Nénkumwènèkèlè mu cikondo cya mwoyi.” Ki mukaji kusekaye mu ntenta, paanyima Pende apu. Ki Yèyè kwamba ne: “Sarah waseki bwa cinyi?” Nwamonu anyi? Mpindiyewu Yèyè’s uvwa mufwanyine kwikala mushipe Sarah anu mwaba awu, bwa kuseka kwa Dìyi Dyende; kadi Kavwa mwa kucyenza to, bwalu Sarah uvwa citupa cya Abraham.

133 Nénku lelu ewu, Yesu mmwambe mu Luuka nshapita wa 17 ku mvensa wa 30 ne: “Anu mwakadibi mu matuku a Lota, ki mwikalabi kabidi ku cikondo cya nshiikidilu pìikalà Mwânà wa muntu. . .”

134 Mpindiyewu vulukaayi ne: “Mwânà wa muntu” *m’mpupofeta*. Yehowah wakabiikila Yehezekele ne “mwânà wa muntu.” Yesu mmulwe mu mènà asatu: Mwânà wa muntu, Mwânà wa Davidi, Mwânà wa Nzambi. Wàkadibiikila Yèyè mwine ne “Mwânà wa muntu” bwa bantu kumonabo mwa kuumvwa, bwalu Yèyè uvwa Mupupofeta awu uvwa Mukalenge Nzambi ne cya kajuula.

135 Mpindiyewu monaayi, pashiishe Wàkalaya cinyi? Mwânà wa muntu uvwa mwa kuDibuulula cyakabidi kumpala menemene kwa ciine cikondo aci, kumpala kwa kapyà. Ne aci ki civwà cimanyinu cya ndekeelu cyàkamònà Abraham kumpala kwa mwânà mulaya awu kufikaye; ki kwalukilaye nsongaalume, ne mukaji kwalukilaye nsongaakaji. Kumpala kwa. . .Monaayi mpindiyewu, Mufundu ngudi wamba anu mu mushindu musunguluke, mpindiyewu tudi ne cya kukeba cyòci aci.

136 Ne pashiishe twètù bamone buloba mu dinyanguka dya maalu ne bintu bìdimu lelu ewu ebi, twètù batungunuke mudibo benza emu dîbà adi mmunyi mutùdì mwa kwamba ne cyacya ncyà bushuwa kadi katuyi twamba ne cikwabo eci cyòci ncyà bushuwa? Bwalu, muntu kampanda, wèwè udi weyemena dyumvwa dyende, kadi kadiyi dyumvwa dya Mfumu wa Mwoyi Uvwa Mupersona uvwa naabo ku ciibi cya cimenga ku Sodoma awu to. Mpindiyewu, tudi tumona ne, twètù katwena tweyemena dyumvwa dyetu twètù biine to.

137 Noa kaakeeyemena dyumvwa dyende to. Civwa cikondo cinene cya maalu a mamanya, kadi yèyè kaakeeyemena dyumvwa dyende dya dituku dyende to. Kadi wakeeyemena mulayi wa Nzambi, ne wàkenza cyenzi ku bukole bwa Nzambi, ne wàkalongolola bwàtù bwa kusungila baa mu nzubu mwende. Pàvwàbi ne, kakuyi mpatà to bivwa bibengane ne cyumvwilu cyetu cya ciibidilu eci; kakuvwa màyi muulu mwamwa to, kacya kaàvwakù manji kwikalamu to. Kadi yèyè uvwa mumanye ne, pìikalàbi ne Nzambi wakamba ne avwa mwa kwikalamu, avwa mwa kwikalamu. Pa nanku yèyè kaakeeyemena dyumvwa dyende yèyè mwine to, kadi ku diitabuujà yèyè wakenza cyenzi ku Dìyi dya mulayi wa Nzambi. Nyuma wakamusaka, ki kucyenza.

¹³⁸ Abraham, yêyè kaakeyemena dyumvwa dyende bwa mwoyi wa buntu to. Uvwa musele mukajende awu pacivwaye ne bidimu bitwe ku dikumi ne mwandamutekete. Ki yêyè ewu, ne bidimu makumi mwandamutekete ne bitaanu, ne mukaji pende ne bidimu makumi asambombo ne bitaanu, mwakunyende ku bidimu dikumi. Kadi Abraham kaakeyemena dyumvwa dyende to, pàakambà Nzambi ne Neamupeelee mwànà wa balume kùdì Sarah. Kadi yêyè wakabiikila cintu cyònsò, cijaadiki kana cyònsò cya maalu a mamanya civwà cibènganganà ne Dìyì dya Nzambi aci, dilonga kana dyònsò dya tulaasa divwà pambelu paa Dìyì dya Nzambi adi, bu ne kacivwa nanku to. Ne yêyè wakapa Nzambi butumbi, mwikàle ne dikanda, uMupa butumbi. Kavwa nansha mene mutangè ditangila dya mubidì wende yêyè mwine anyi difwa dya mubidi wa Sarah to, anyi—anyì mubidi wende to. Kaakatangaku nì ncinyi nì ncinyi to, kadi wàkeeyemena mulayi wa Nzambi. Kaakeyemena dyumvwa dyende yêyè mwine to. Kaakeyemena dilukakaja dya ngenyi to.

¹³⁹ “Mona’s,” mùdì wèwè wamba, “Mwaneetu Branham, cidi cyènza ne Nzambi mmufwanyine kubenga kwondopa babeedi, s’mbwalu tudi ne bangangabuka balenga bààbùngì.”

¹⁴⁰ Bible mmwambe ne: “Tudi tutonkola dilukakaja dya ngenyi.” Twètù katwena tulukakaja ngenyi to. Diitabuuja kaditu dilukakaja ngenyi to. Diitabuuja didi diitabuuja ne diitaba. Monaayi’s.

¹⁴¹ Kadi yêyè wakiitabuuja pamutu paa kubenga kwitabuuja; ne wàkabiikila bintu, bivwà kabiyiku abi, byenze bu ne bivwaku, ciine aci kakuyi mpatà to ciikàle cibènganganà ne dilukakaja kana dyònsò dya lungenyi. Kadi yêyè kaakalukakaja lungenyi to. Yêyè wakaciitabuuja anu cyanaana. Kakuvwaku dilukakaja dya lungenyi nansha dimwe divwà mwa kujaadika ne mwànà awu uvwa mwa kulediibwa to. Mukaji awu ukaavwa mumane kupita cikondo cya kuya ku mashi kukaavwa bidimu bitwe ku makumi abidi, ne mubidi wa mulume ukaavwa mene anu mumane kufwa. Nenku paakakumbajaye bidimu lukama, bidimu makumi abidi ne bitaanu paanyima, yêyè ucivwa anu upa Nzambi butumbi, bibènganganè ne mushindu wònsò wa dyumvwa. Kadi ku diitabuuja, yêyè uvwa mumanye ne Nzambi uvwa mwa kushaala mukwate ku Dìyì Dyende. Kaakeeyemena dyumvwa dyende yêyè mwine to.

¹⁴² Ambaayibi tũng bu ne Mòsà wakeeyemena dyumvwa dyende yêyè mwine, pàakamwambilà Nzambi ne yêyè uvwa ne cya—cya kwangata Pâlò apu. . . anyi bânà baa Izaleela bwa kubuumusha mu cyanza cya Pâlò? Ambaayibi tũng bu ne yêyè uvwa mweyemene dyumvwa dyende yêyè mwine, pavwaye mwaba awu ku luseke lwa Dikunji dya Kapya apu, pàakambà Nzambi ne: “Pweka ndaaku ne Mémè nêngiikalè neebe” apu? Ambaayibi tũng bu ne yêyè uvwa mweyemene dyumvwa dyende paakayaye naabo too ne ku Mbù Mukunze apu, ne ki bôbô abu ku mâyi,

ne Nzambi pende apa mubalaye buloba bulaya abu? Ambaayibi tũng bu ne yêyè uvwa mweyemene dyumvwa dyende yêyè mwine ne: “Nênsabukè kuya dyamwamwa bishi? Peetu nyawu katuyi ne dîbà dya kwibaka cilamba. S’ki cilwilu ncyeci cyenda cilwa anu paanyima peetu menemene. Monaaku mikuna nyeezi ku luseke ne ku luseke. Mâyi ngôwò aa kumpala kwetu, Mbû Mukunze?”

143 Mpindyewu, bu ne yêyè wakeeyemena dyumvwa dyende yêyè mwine, nunku mmwele byanza muulu muvukute lubilu, mukadyûpwile ku makàsà a Pâlò, mwambe ne: “Pâlò wa yààya, mfwilèku luse, mêmè ngudi mwenze cilema.”

144 Kadi yêyè kaakeeyemenaku dyumvwa dyende yêyè mwine to. Kadi wâkasambila, ne Nzambi wakamwambila bwa kuya kumpala, ne mbû wakakanguka, civwà ciikàle cibengangana ne dilukakaja dyônsò dya ngenyi. Kadi yêyè kaakeeyemena dyumvwa dyende yêyè mwine to.

145 Ambaayibi tũng bu ne Yôshuwa, paakayaye kuntu kwaka ne mangumba makwabo dikumi awu, ne muye kwaka mukamone buloba bulaya bwa Nzambi abu, ne mwalukile naabo mwambe ne: “Mpindyewu anji indilaayi kakese. Bwalu mbulelela. Twètù tuvwa bamweke anu bu tupasu. Bôbò mbantu baa mfyondo. Mmunyi mene mutùdi mwa kubakwata’s? Nyewu katuyi nansha ne myele ya mvita; anu bitudi bangule panshi ebi. Mmunyi mene mutùdiku mwa kubwela ne kukwata buloba bwabwa? Mona’s, s’mbikole bipange ne mwa kukola. Bôbò nyawu batupite twètù ku bûngì, bantu makumi ataanu bwa umwepele. Bôbò badi masalaayi malongesha bilenga, patùdi twètù anu musumbà wa balami baa mikooko ne basopi baa bitoci bapatuke mu Ejipitu. Mushindu kaayi? Baa bwalu katuyi nansha ne ngabu anyi bintu kampanda to, mmunyi mene mutwakwataku buloba abu?”

146 Mona’s, ncyà bushuwa ne dyumvwa divwa difwanyine kujaadika ne bôbò kabavwa mwa kucyenza to. Disalaayi kana dyônsò bu muvwaye yêyè amu, anyi Môsà, kavwaku mufwanyine kweyemena dyumvwa dyende yêyè mwine to. Kadi dyabo dyumvwa, kabaakadyeyemena to. Kadi bavwa bamanye ne Nzambi uvwa mwambe ne: “Mêmè nkaadi munupe buloba abu. Ndaayi nubukwate!”

147 Kwikadi mweyemene dyumvwa dyebe wêwè mwine to. Wêwè mweyemene dyumvwa dyebe wêwè mwine leelu ewu paudi usaama apu, pâmwâpa musômbe mu dikalu dya balema, upunga ne lufu bwa kansere, bwa disaamâ dya mwoyi, ne ngangabuka pende eku wàmba ne ufwâfwa, wêwè mweyemene dyumvwa adi, ufwâfwa. Kadi kwikadi mweyemene adi dyumvwa to. Ncyà bushuwa.

148 Citwamba ncinyi bwa ku bimanu bya Yeleko, bidibo bamba ne bavwa mwa kwenzelapu manayi a mbilu ya dipiiyangana ne makalu a mvita pamutu pààbì apu, bimanu binene bya menemene abi? Nzambi uvwa mwambe ne: “Ndaayi kuntwaku

nucinyunguluke misangu bûngì kampanda, ne nwèlè mpungi ne nwènù bônso nwèlè mbila, nenku cimanu aci necyupuke.” Ee, kakuyi mpatà to aci’s civwa cifwanyine kwikala cikutakane bwa meeji a musunya. Kadi Yoshuwa, mumanye mupimbu uvwa naawu bimanu abi, bu muvwabi ne yèyè ukaavwaku mwibake bimanu bûngì cyanaana mu Ejipitu. Ûvwa mumanye nshaamenda uvwa mwelamu, mushindu uvwabi bishile, bwa byôbi kutwala manayi a mbilu ya dipiiyangana ne makalu a mvita awu pamutu apu, mene ne nzubu miibaka pamutu pààbi apu. Kadi yèyè kaakeeyemena dyumvwa dyende yèyè mwine to. Yèyè uvwa mwitabuuje ne civwà Nzambi mwambe civwa bulelela, ne wàkatùmikila Dìyì Dyende, ki bimanu kuupukabi. Kayi mweyemene dyumvwa dyende yèyè mwine to.

¹⁴⁹ Ambaayibi tûng bu ne yèyè munkaci mwa kulwangana mvita ayi, ne, mûmvwà nyiisha mu dyalumingu amu, ne pashiishe dîbà pààdì kubanga diikadi dibwela, ne balwishi bàkaavwà baye bimpàmbâmba abu. . . Anu bufuku abu nunku’s mbadisange ne baalukile ne bukwapo bukole, bashipe bantu bende bûngì cyanaana. Mpindyewu ambaayaaku tûng bu yèyè mwambe ne: “Bidi binkengela muunya. Bikengela anu mêmè ne ndambu mukwabo wa muunya. Ee, mpindyewu anji indila kakese. Nzambi’s ngudi muteeke bulongame ebu, nenku dîbà’s didi dinyunguluka bwa buloba kunyungulukabu. Mpindyewu twânjì tumonebi tûng, bu mêmè mwa kwambila dîbà bwa kwimanadi. . . Pàmwâpa buloba bôbò anu budidinge bwimane mpindyewu, dîbà adi’s mbufwanyine kujimija bukole bwabu bwa dikoka dya bintu abu, mêmè’s nêmpone?”

¹⁵⁰ Yèyè kaakateelejaku dyumvwa dyende to. Cintu cimwepele cyakambaye, civwa cya ne: “Wèwè dîbà, imana kaaba kamwe; ne wèwè, ngondo, shaala anu mwaba wûdì awu,” ne dyôdì pààdì kumutumikila’s. Yèyè kaakeeyemena dyumvwa dyende yèyè mwine to. Kadi wàkeeyemena mulayi wa Nzambi wa ne: “Ndi munupeeshe buloba abu; ndaayi nubwângâtè.”

¹⁵¹ Yèyè mmukupeeshe mulayi wa Nyuma Mwîmpè. Wèwè udi mwa kuMupeta mu mpungilu ewu. Udi mwa kuMupeta mpindyewu.

¹⁵² Kwikadi mweyemene bya ne: “Udi mumanye’s, ndi mucyoke. Nya’ nkwabwila’s, ndi mudye muukute be mu didya dya diloolo edi. Ncyêna—ncyêna—ncyêna muswe bwa John ammone mêmè ngenza eci to.” Kaa, bwa dinanga dya Nzambi! S’nyawu udi mweyemene dyumvwa dyebe wèwè mwine.

¹⁵³ “Mulayi udi kunudi nwènù, ne kùdì bânà baa bânà beenu balela, ne kùdì aba bàdì kule, mu bûngì bwônso bwabiikila Mukalenge Nzambi wetu abu.”

¹⁵⁴ “Ngangabuka mmwambe ne nêmfwe. Mmunkenkete, ne mwambe ne ndi ne kansere aka, ndi ne cikampanda, anyi cyônso civwàku aci. Bûndi naabu mêmè mbwa kufwa.” Kwikadi

mweyemene ku adi dyumvwa to. Nzambi m’Mukalenge Nzambi webe Udi wondopa māsāamā ebe ōnsò. Pa nanku kwikadi mweyemene adi dyumvwa nansha, dyumvwa dya muntu nansha umwe. Ikala mweyemene dyumvwa dya Nzambi.

¹⁵⁵ Twāmbè bishi bwa Shimishoona, mu budimi mwamwa, pāvwa beena Peleshete, bantu cinunu cijima balwe lubilu badyèlè pambidi pende apu? Nenku ki yèyè uvwa mwimane pàapa wawa, kàmpimpinyāmā, kakese kaa menemene, kàà nsuki mvwangala, kàà bule *ebu* aku. Kavwa, ee, kavwa mulwanganyi wa ne mwele wa mvita to, bwalu kavwa mumanye to; kavwaku mulongesha dya mu busalaayi. Yèyè uvwa anu kaacilūmaacikāji kakese kàà nsuki mvwangala, bu nanku’s, kiikāle ne bipya mwandamutekete bilembelele, mwānā wa balume wa maman, mwimane pàapa, kadi ki beena Peleshete cinunu bālwalwā aba. Ee, yèyè kavwa ne cintu nansha cimwe mu cyanza to. Mmwenze anu utangila panshi nunku, ki kupetaye mufuba wa lubanga lwa kampundu, wa kale, mutookoloke wōnsò ne muunya, ki kuwambulaye.

¹⁵⁶ Mpindyewu kwambaye ne: “Twānji tumonebi, mpindyewu, ncyakwenza cintu cya nsongo ne *eci* to, bwalu bifulu bya mvita bīdi ku mitu yabo byabya bīdi. . . Beena Peleshete baba, bōnsò masalaayi, badi bōnsò ne mafuma. Badi bōnsò ne binkutu bya byamu. Ne cyōnsò cya ku bifulu byabo bya mvita cidi ne bujitu bwa livres dikumi ne yitaanu [kilò 7], bantu banene bale, bōnsò bafuunè. Ee, mēmè anu mudidinge mutuutemu mufuba wa kale wa uvingutuka wa lubanga lwa kampundu ewu, pa cimwepele cya ku bifulu bya mvita byabya, mona’s, s’mmuwanyine kuingutuka. Kī mmwōmò anyi?”

¹⁵⁷ Yèyè kaakeyemena ku dyumvwa dyende to. Yèyè wakangata anu cīvwa mu cyanza cyende aci, kubangaye kutuuta naaci beena Peleshete abu. Ne paanyima paa yèyè mumane kubatuuta cinunu cijima mubalaadike panshi myandanda, kutungunukaye anu ne kwikala ne mufuba wa lubanga awu mu cyanza. Amen.

¹⁵⁸ Cidì teoloji wa muntu wamba nansha ciikāle cinyi, kwikadi wèwè mweyemene aci to. Ikala mweyemene Dīyi dya Nzambi ne: “Yesu Kilisto udi umwèmwè awu makeelela, leelu, too ne kashidi.” Neya bushuwa ne, ki cyakiitabuujaye.

¹⁵⁹ Ambaayi tūng bu ne Davidi wakateeleja teoloji wa Shimis-. . . wa Shawula awu? Ki Goliyata wawa mwimane kwaka ne dyambu dyende dinene adi, ne bōnsò ne bwōwā bu tumwe; Shawula, mutu ne makaaya kumutu kwa cilwilu cijima aci. Goliyata kwambaye ne: “Muntu kampanda apatuke alwe bwa kulwangana naanyi. Kabyena bikengela bwa—bwa twètù bōnsò kufwa nansha. Mēmè mukushipe, dībā adi nwènù bōnsò nenutukwacile twètù mudimu. Kadi wèwè munshipe, mona’s, twètù ki baanukwacila nwènù mudimu,” bwalu yèyè nguvwa ne dīyi dya kwamba pa yèyè. Mushindu awu ki ütù dyabulu

muswe kwenza, pakaadiye mumane kulongolola seminere wende mujima awu, ne bônso abu, pakaadiye wenda ulwa apu, nwamonu's.

¹⁶⁰ KaaDavidi kaa kale aku kenda kendakana kwaka, kavwale cipese cya ciseba cya mukooko; kalumyana kakunzubile, kaa tukaaya tukobame, kaa bujitu bwipacila livres lukama [kilô 45,36], lukama ne dikumi [kilô 50]. Kwambaye ne: "Nudi baswe kungambila ne bilwilu bya Nzambi udi ne mwoyi, bidì bitengula bilondeshile cipungidi abi, nebishaale anu kacya biimana mwaba awu bwa kulekela mwena Peleshete udi kayi mutengula wawa wela bilwilu bya Nzambi udi ne mwoyi kadyòmbò anyi?"

¹⁶¹ Shawula kwambaye ne: "Vwila apa, nsongaalume." Yêyè ne: "Ndi ngaanyisha bukitu bûdì naabu, kadi matuku a bishima's akaadi mamane kupita. Cintu bu nanku katwena naaci to, wamonu's. Kadi imana nkwambileku cintu kampanda, nkarta kaayi kaa buumambala kaudiku mwa kuleeja, wamonu anyi? Nyawu kuyiku nansha ne cya mvita ciine. Kuyi kantu nansha kamwe to anu ndundu wa nyuunyi mu cyanza. Wamonu anyi? Kuyi ne dipolome dya Ph.D. anyi dya LL.D. Ciine eci neücyènzè bishi? Mona's, muntu awu's mmulwanganyi wa mvita. Mona's, yêyè's—yêyè's udi D.D., L misangu yibidi, Ph.D., LL.Q. Mona's, yêyè's mmupete mapolome bûngì cyakaa, mufwanyine kuàlamika ku cimanu cijima. Kadi wêwè udi nganyi? Mulami wa mikooko."

¹⁶² Yêyè ne: "Kadi ndi muswe kukwambila cintu kampanda." Yêyè ne: "Udi mumanye mùdì bwalu?" Yêyè ne: "Mvwa ndiisha mikooko ya taatù wanyi kuntu kwaka, nenku," yêyè ne, "nyama wa ntambwe kubwela e kukwata umwe wa ku yôyi, kadi e kuyaye lubilu. Kadi udi mumanye's, mêmè kwangata ndundu wa nyuunyi mukese ewu kadi kulumbatangana nende, ne mêmè kumubyankula panshi. Mêmè kumunyenga mwâ—mwânà wa mukooko awu mukana, ki kujuukaye bwa kundwisha pângaakenzà nanku. Mêmè kwangata anu keele keetu aka e kumushipa." Yêyè ne: "Mêmè kwalukila. Kadi ki nyama wa ours udi ubwela ewu, wenda ulonda mukooko awu, ne kuwukwataye ne lubilu. Mêmè kumushipa kabidi, yêyè awu." Yêyè ne: "Mpindyewu Nzambi. . . Kì m'Ph.D. wanyi to, kì ndyumvwa dyanyi mêmè mwine to. Ncyêna mwa kukwambila ne ndi mbyenza bishi to. Ncyêna mumanye ne bidì byenzeka bishi to. Kadi Nzambi," amen, "Nzambi mwine wâkansungila ku dikama dya ours ne dya ntambwe awu, ambâku tûng mwabengaYe kunsungila ku cyanza cya mwena Peleshete udi kayi mutengula wawa!"

¹⁶³ Mwepiskopo, Shawula, kwambaye ne: "Udi mumanye's, mêmè ndi ngiitabuujà ne udi ne dibiikila, wêwè nsongaalume. Nênkwambilè, wêwè museemeneneku lwà mwaba ewu, mêmè nênkulongeshè mwa kulwangana mvita ya babidi, wamonu's.

Nenku nênkwambilè's, mêmè ndi—mêmè ndi docteur, pa nanku angata byanyi bya mvita ebi uvwale. Ndi muswe nkuvwadike.” Davidi kwimanaye mwaba awu, nenku kumupeeshabo dipolome dya Ph.D., dya LL.D., ne byônsò abi, kadi—kadi kakwacikwetu aku kakàciyiku nansha mwa kunyunga to. Kayi mumanye mwa kupita naabi to.

164 Yèyè ne: “Kacya mêmè nci tu mujaadikeku eci to. Cinkutu cya bwena ntendeleelu aci kacyena cinkumbanaku to. Umusha cintakanyi aci. Undekele mêmè nye ne civwà Nzambi munkwacishe naaci aci.” Aci civwa ndiitabuuja mu bukole bwa Nzambi. Nenku yèyè—yèyè kavwa mweyemene dyumvwa dyende yèyè mwine to. Kavwa mweyemene civwà kampanda mukwabo mwambe to. Úvwa mweyemene diitabuuja. Bwalu, yèyè uvwa mumanye ne piikalàbi ne Nzambi wakamusungila ku dikama dya nyama wa ours, kadi ambàku tũng muvwaYe mufwanyine kubenga kumusungila kùdi mwena Peleshete awu!

165 Ee, piikalàbi ne Nzambi wakakunanga bikole mu mushindu wa ukupatula mu mpekaatu ne ukuuja tente ne Nyuma Mwimpè, ncilumbu kaayi eci nwênù bintafu bitulumuke bikwate ne bya luse bya mu nyungulukilu wa ditunga dijima ebi, Yèyè kaakunusungila ku lutatu lwenu alu bu mudiYe mulaye ne Neàcyènzè anyi? Dìyi dya Nzambi ndidi dyambe nanku. Yèyè's neàcyènzè. Cya bushuwa, Yèyè wakamusungila mu cyanza cyende aci.

166 Kaa, yônsò wa ku baprofeta, anji ambaayibi tũng bu ne bavwa beeyemene dyumvwa dyabo bôbò biine mu cikondo cyabo? Nunku kî mbayeku tamakatamaka too ne kùdi baakwidi ne baakwidi banene abu, ne bababiikile ne “bimanu bilaaba lupemba” ne bikwabo byônsò abi to. Nunku kî mbambeku biprofeta bivwà bibengangana naabo bôbò abi to. Bavwa mwa kwikala mùdi baprofeta baa cyena leelu aba, bavwa mwa kwikala biitabakana ku mêyi, bavwala bilàmbà bya kapelu, ne biikàle mu nzubu ya bamfumu.

167 Anji ambaayi tũng bu ne Yone wakateeta kweyemena dyumvwa dyende yèyè mwine? Kadi's yèyè wakaya tamakatamaka too ne mwaba awu.

168 Bôbò kwamba ne: “Mpindyewu, anji indilabi kakese, Yone, kuyiishiku pa *Dibàkà Nè Difuwà Dyà Dibàkà to.*”

169 Yèyè wakaya tamakatamaka too ne kwa Heloode, ne wàkamba ne: “Kabyena bikumbanangana ne mikenji bwa wèwè kwangata mukaji awu to.” Eyowa's, mukalenge.

Bôbò ne: “Ee, udi mumanye ne nganyi mwine awu? Awu's ki munen- . . .”

“Nansha mwikàle nganyi.” Kavwa mweyemeneku to.

170 Bôbò ne: “Mpindyewu wèwè's udi mumanye ne kwèna ne cya nsongo ciine. Wèwè nyewu udi anu mu cipeela emu. Nsangilu

kaakukwakidilaku to, wêwè mwikàle wenza maalu mushindu awu.” Yêyè kavwa ucyuka bya nsangilu nî ngwa bishi nî ngwa bishi to. Kavwa yêyè mweyemene dyumvwa dyende yêyè mwine to, kadi dyumvwa dya Nzambi. Bushuwa’s.

¹⁷¹ Kuvwa muntu umwepele uvwa mweyemene anu cya bushuwa dyumvwa dyende yêyè mwine, ne dîna dyende uvwa n’Yudaasa Mpongoloki. Kaa, yêyè. . . Mêmè—mêmè ncyêna ngumvwa mwakafikaye ku dicyenza to. Yêyè wakenda mwikàle utangilangana ne Kilisto mpala ne mpala, anu mùvwà Eva wenza ku cibangidilu amu. Yêyè wakamona dishindika adi, wakatàngila Nzambi mumpala, mùvwà Eva wenza mu citaleela cya diloolo amu. Eva uvwa utangila Kilisto, mu citaleela cya diloolo, mu budimi amu. Ne Yudaasa wakasòmba mu citaleela cya diloolo, mu lupangu lwa Getsemane ne mu myaba yàbùngì, ne yêyè wakatàngila Kilisto anu umwèumwè awu; ùvwa muteeleje muvwaYe ulongesha, uDijaadikila ku Dìyì, mushindikibwe ne ki Muprofa wákamba Môsà ne neajuudiibwe awu. Ne ùbàmbila mu Mifundu ne Yêyè uvwa Nganyi, ne byònsò bivwà bitàngilà cyòci aci. Baakacimona cijaadikiibwe kudi Nzambi, ne ùvwa n’Yêyè, kadi pashiishe yêyè kweyemena dyumvwa dyende yêyè mwine.

¹⁷² Uh! Yêyè uvwa mwa kucyenza anyi? Mbwalu kavwaku naaci munda *emu* to, anu kwine kwònsò aku. Yêyè kavwa dimiinu ditolweshwa to. Ùvwa mwànà wa kabutu, mulela mupatukile mu kabutu, kwalukilaye ku kabutu. Mpindyewu tudi tumona. Kadi wakakwat njila e kuya, pàmwàpa uvwa mwa kwikala mupeteku cingenyinyeni cya dyumvwa dyende. Ùvwa mwa kwikala mudyèlèlee meeji ne Yesu. . . Ùvwa ne kaneemu kààbùngì be Bwende Yêyè ne: “Mpindyewu, udi mumanye’s, ndi anu mufwanyine kuMusùmbisha ku binjanja bya mfranga makumi asatu. Nenukumêmè mucyènzè, nêmpetèku ndambu wa mfranga, nenukumî mwa kwenzaku naayi cintu kampanda. Kadi Yêyè’s mmukumbane kuDisungila.” Nwamonu’s, yêyè kavwa mumanye ne, mu Mifundu, yêyè uvwa mujuuke bwa kwangataye kaaba kamwekamwe aku to.

¹⁷³ Nansha bantu leelu ewu kabeena bafika ku dyumvwa ne badi basanganyiibwa mu ngiikadilu kaayi to. Mbilongolola bwa ekeleeziya wa Laodikiya ewu kwikalaye mu ngiikadilu ewu, wèla Kilisto pambelu. Ne Yêyè munkaci mwa kukookola, ukeba bwa kwalukila munda. [Mwaneetu Branham udi utuuta bintu pa cyambilu—Muf.] Kakuyi dikwacishangana dya mu mudimu mwaba nansha umwe to, nansha nanku. Ùshindika Dìyì Dyende mu dituku edi mpindyewu, anu mukaadiYe mwenzenze mu dituku ne dituku dyònsò, kadi bôbô anu baseesukaku. Beeyemene dyumvwa dyabo bôbô biine, ki—ki cyònsò cidiku ncyòci aci.

¹⁷⁴ Anyi, pàmwàpa, twànjàayi kwamba cyakadyambidilaye aci—aci. Pàmwàpa piikalàye musùmbishe Kilisto ku binjanja

bya mfranga makumi asatu, mona's, bwa wàmòna mwa kupetaku bwobumwe ne—ne amwe a ku mangumba manene a dituku adi, Bafaalesa ne Basadoka. Ùvwa mufwanyine kwamba ne: “Mpindyewu anji indilabi tũng, Yèyè's udi mwa kuDikuba. Mèmè's nkaadiku muMumone mu mvita ya minene; ndi—ndi mumanye ne—ne Yèyè udi mwa kuDikuba. Pa nanku ndi mufwanyine kupetaku ndambu wa mfranga, cyenzeku bu ndambu wa dikuta dya—dya pàngũikalà nkaadi mukooke, mùvwàbi amu. Ne pashiishe, kabidi, ndi mufwanyine kupetaku mwaba munene wa luumu mu miine ekeleeziya ya leelu ewu eyi, bu mèmè mwa kuMutungila kudibo aku.” Nwamonu anyi? Kadi yèyè uvwa mweyemene dyumvwa dyende yèyè mwine, pamutu paa dyumvwa dya ne civwa n'Diyi dya Nzambi dishindika, ki kwenzelaye Yesu anu civwà Mifundu myambe ne neñzè aci.

¹⁷⁵ Nenku, leelu ewu, bukwàèkèleeziyà mbwele Kilisto pambelu mu matuku a ndekeelu aa, anu menemene mùdì Mukanda wa Bwakabuulwibwa mwambe ne bôbò nebàcyènzè. S'nyuma wa Yudaasa cyakabidi, mu mmwenekelu wa ekeleeziya: “Biikàle ne cimwenekelu cya difwana dya Nzambi, kadi biikàle bavila Dìyi.” Nwamonu anyi? Aci ncyà bushuwa. Mpindyewu, kaa, ekelekele, byavu kufila cipeta kaayi? Lufu's, anu mwakenzelabi Eva amu. Nenku cidi cyenzekela bônsò bàdì bàteetà kunyangakaja Dìyi dya Nzambi ne beeyemena dyumvwa dyabo bôbò biine abu. Nansha mpindyewu badi basùmbisha, kakuyi ku binjanja bya mfranga makumi asatu to, kadi pàmwàpa biikàle bashaala, kaa, muntu kampanda munene wa bukookeshi, dilabula kampanda dya seminere. Kaciyi nansha cifwanyine kwikala cya mushinga wa binjanja bya mfranga makumi asatu to, kadi nansha nanku bôbò badi bàcisùmbisha; bàsùmbisha dyumvwa dyabo dya Nzambi, badishintakaja's, ku cintu cya mushindu awu.

¹⁷⁶ Mushindu mwine udibi bishiilangane's ne Pòlò Munsantu uvwa muntu munene mulonge tulaasa awu, yèyè uvwaku ne dimanya dyònsò divwaye mufwanyine kuditambishila adi. Kadi yèyè wakamba ne: “Ndi mwimanshe cintu cyònsò nkòong, cya dilukakaja dyanyi dya ngenyi aci, mucimànshe. Mèmè ndi mutuutakeene ne Dikunji dya Kapyà dituku kampanda, mu njila wa ku Damaseke.” Nenku kwambaye ne: “Ncyakalwaku kunudi ne bulenga bwa muyiiki to, bwalu, bu mèmè mwenze nanku, nunku nudi beeyemene lungenyi lwa bantu. Kadi ngàkalwa kunudi mu bukole ne dileeja dya Nyuma Mwîmpè patooke, bwa nwènù—nwènù kweyemena Dìyi dya Nzambi.” Amen. Yèyè ne: “Kwòkò kulwe Mwanjelo mufumine mu Dyulu, uyiisha cikwabo cintu nansha bamba ne ncinganyi, ediibwe mulawu,” Galatiya 1.8. Ncyà bushuwa. To, mukalenge. Kaakacyenzaku to.

¹⁷⁷ Mukaji mutekete wa ku ciina cya mâyi awu, ùvwa wa nsòmbelu wa masandi. Kadi ùvwa mumanye ne ekeleeziya yikaavwa mimwipate. Nenku, kadi kavwaku yèyè mweyemene dyumvwa dyende yèyè mwine to. Paakatwilanganaye ne Yèyè

ewu ku ciina cya mâyi, Yêyè wâkamwambila mpekaatu yônsò yivwaye mwenze awu, wâkavükuta lubilu e kubwela mu cimenga. Mpindyewu kabivwa bikumbane bwa muntu mukaji kwenzaye cyôci aci to, bwa kubwelamu ne kwamba nî ncinyi nî ncinyi, bwalu yêyè uvwa ndumba. Kadi paakatwilanganaye ne Yesu, yêyè kaakeeyemena dyumvwa dya bantu to, baa matuku awu abu. Wâkalwa, kwamba ne: “Lwâyi, kanumonaayi Muntu Udi mungambile bintu bîndî mwenze. Kî m’Maasiya mwine awu anyi?” Kaakeeyemenuku dyumvwa dyende to. To.

¹⁷⁸ Virgo Mariya, Mwanjelo Ngabudyele paakatuutakeenaye nende, nenku, kumwambilaye ne nealele mwânà, kayi mumanyangane ne muntu mulume to. Yoyôyô! Kacivwakù cyanji kwenzeka kacya to. Yêyè kaakeeyemena dyumvwa dyende yêyè mwine to, dya ne muntu mukaji kavwaku mwa kulela mwânà kayi ne—ne bayende. Kaakeeyemena aci to. Kadi yêyè wakamba ne: “Musadidi wa Mukalenge nyêyè ewu, bingenzekele bilondeshile Dìyì Dyebe.” Yêyè kaakamba ne: “Nêncyenzè bishi ciine aci? Ne ndîbà kaayi mene dîngààcyènzà? Ne biine byônsò ebi nebyenzeke bishi?” to.

¹⁷⁹ Mwanjelo wakamba ne: “Nyuma Mwîmpè neakubwikile mundidimbi; ne Cintu Cinsantu cyâlediibwà munda mwebe aci necibiikidiibwe ne Mwânà wa Nzambi.”

¹⁸⁰ Yêyè kwamba ne: “Musadidi wa Mukalenge nyêyè ewu.” Yêyè kaakangata dilukakaja dyende dya lungenyi, wamba muvwabi kabiyi mwa kwenzeka nansha. Wakamba anu ne: “Musadidi wa Mukalenge nyêyè ewu.” Ncya bushuwa. Monaayi.

¹⁸¹ Mukaji uvwa ne—ne mashi alwa munda awu, ngangabuka uvwa mumwambile, ne: “Kakwenaku ditekemena to.” Ûkaavwa mutuule byende pende byônsò bivwaye naabi bwa kudya, kùdi bangangabuka, kadi nansha umwe wa kudibo kayi mwa kumukwacisha to. Kadi yêyè kaakeeyemena aci to. Pààkalwà Yesu . . . Kudifindaye mu musumbà wa bantu amu, e kwambaye ne: “Ndi ngiitabuuja ne bu mêmè anu mwa kulenga bivwalu bya Muntu wawa, nêngòndopiibwè.” Kuseemenaye.

¹⁸² “Mpindyewu anji indilabi tûng, ngangabuka’s mmwambe ne: ‘Kwèna mwa kwondopiibwa.’” Yêyè uvwa ne disaamà dya mashi alwa munda edi kukaavwa bidimu ne bidimu. Ûkaavwa wenda uteketa anu kuteketa dîbà dyônsò, ne byenda anu binyanguka. Bangangabuka bakaavwa bamwele làà. Ki dyumvwa dyônsò divwabo pààbò naadi.

¹⁸³ Kadi yêyè wakamba, ku diitabuuja! Kakuvwa Mufundu nansha umwe wùvwà mumwambile bwa kwenza ciine aci to. Kadi wâkamba ne: “Bu mêmè anu mwa kulenga luzemba lwa civwalu Cyende, nêngòndopiibwè,” ki yêyè kudifinda ne kuMulengaye. Yêyè kwalukila, e kusòmbayè.

184 Yesu kukudimuka e kwamba ne: “WâNdengi awu nganyi?” Yêyè kukenzakana too ne paakalwaYe kumumona. Yêyè kumwambila bwa dîsaamà dyende dya mashi alwa munda adi.

185 Ki kuumvwaye pa diine dîbà adi, mu mubidi wende yêyè mwine. Kavwa mwa kucijaadika dyakamwe to, kadi wàkumvwa mu mubidi wende yêyè mwine amu ne dîsaamà dyende dya mashi alwa munda adi dyakiimana. Yêyè kaakalukakajaku lungenyi ne: “Piikalàbi ne ngangabuka uvwa mumane kumwela làà, mmunyi muvwa cintu cikwabo kampana cifwanyine kumwambulwisha?” to. Yêyè kaakadifila ku dilukakaja dya lungenyi to, kadi wakaya ku diitabuuja.

186 Mpindyewu Bible mmwambe ne: “Yêyè udi Mwakwidi Munene, leelu ewu, udi mwa kulengiibwa kùdi dyumvwa dya mateketa etu.” Mmwômô anyi? [Disangisha didi dyamba ne: “Amen.”—Muf.]

Kuyi ku dilukakaja dya lungenyi to, dya wamba ne: “Kaa, aci’s. . .”

Yêyè mmwambe ne: “Leelu ewu cidiYe ncyôci aci. Yêyè udi mpindyewu mene Mwakwidi Munene udi mwa kulengiibwa kùdi dyumvwa dya mateketa etu. Umwèumwè awu makeelela, leelu, too ne kashidi!”

187 Nudi nwelaku peenu meeji bishi pâmvwà kuntu kwaka bu muyiishi wa ba-Baptistes, ne Mwanjelo wa Mukalenge awu mutwilangane naanyi kuntwaku ne kuntumaye ne mudimu wa kuya kenza cîndi ngenza eci? Mona’s, mpaasata wanyi kadi kwambaye ne: “Wâpaadi. Mona’s, udi mwenze cilootaloota, wêwè.”

Mêmè kwamba ne: “Mbîmpè bwa wêwè kwangata karta kaanyi kaa buumambala anu patudi twakulangana apa.”

188 Mpindyewu, yêyè kwamba ne: “Mmunyi mùdi wêwè ewu, mwa kuya kayiisha mu nyungulukilu wa buloba bujima, kuyi nansha mene ne kalaasa kalonga kaa kashaadile aka? Mmunyi mùdiku mwa kuya kasambidila bamfumu baa matunga ne balombodi baa makookeshi maalabale, peebe—peebe—peebe kuyi nansha mwa kwakula mwakulu webe mwine bilenga?”

189 Mêmè ncivwa mweyemene mwakulu wanyi to. Ncivwa mweyemene dikumbanyina kampana dîmvwà naadi to. Mvwa mêmè mutumiibwe ne mudimu. Aleluuyah! Nenku ncyakaya ku dilukakaja dya ngenyi to. Bu mêmè muteeleje dilukakaja dya ngenyi, pâmwâpa nunku nkufwe binunu bya bantu, kukaadi bidimu. Kadi mêmè kwambula Mukenji anu mwakambaYe menemene, mu nyungulukilu ne mu nyungulukilu wa buloba.

190 Ne nyaaya cyakabidi, ku ngâsà wa Nzambi; kabiyi ku dilukakaja dya ngenyi to, kadi ku mudimu muntuma naawu. Aleluuyah! Ncivwa mweyemene. . . Wêwè udi wamba ne: “S’ukaadi ne bidimu makumi ataanu ne bitaanu.” Bu ne mvwa

naabi makumi citeema ne bitaanu, aci kacyena ne cidici cyamba to. Yèyè ucidì anu Nzambi umwèumwè uvwaYe pavwaYe ne Abraham awu. Eyowa's, mukalenge. Kanwikadi beeyemene dyumvwa dyenu nwènù biine to.

¹⁹¹ Nenku paanyima paa cimanyinu cimane kupatuka, ne Diyì dyenda dilonda, ki ekeleeziya kubangayi kundyombola ne kunkangila biibi byayi, pa bwalu bwa Dilongesha, didi nì nganyi nì nganyi wabo kayi mwa kudidinga kwimana kumpala kwanyi bwa kwamba ne n'Dya cya bushuwa anyi ndya mashimi to. Mèmè ndi ngeela yònsò wa kudibo kadyombo. Uh-huh. Kabiya bwa kudifyela to, kadi ndi mumanye mwaba wùndi nsanganyiibwa. Ncya bushuwa. Baakenza cinyi? Baakenza cinyi? Baakakanga ciibi ne ciibi cyònsò. "Mpindyewu ciwenzà ncinganyi?"

¹⁹² Dituku adi, kuulu kwa mukuna, mvwa mwimaneku. Mèmè kwamba ne: "Mukalenge, ndi ne ciibi cyunzulula cimwepele mu ditunga dijima, bwa ku dyanyi dimanya, ki Phoenix, mu Arizona. Cimwepele cìndìku mupete." Ki mèmè kubanga kutuuluka ku mukuna. Anu bitooke tòò múnkaadiku muumvwe muntu kana yònsò ewu wakula amu, wamba ne: "Ciine aci ki cinyi bwebe wèwè? Wèwè ndonde Mèmè." Dìbà adi, kakuyi ku dyumvwa dyanyi mèmè mwine to. Nèngèèyemenè mulayi Wende.

¹⁹³ Kaa, mulunda wanyi, kwikadi weyemena dilukakaja dya ngenyi to. Dìbà adi ela lubila, pamwe ne Eddie Perronet wa kale awu ne:

Bònsò basekelele bukole bwa Dìnà dya Yesu!
Banjelo bapone mikookwela;
Lwàyi ne cifulu cya butumbi cya bumfumu,
Ne nuMwaseci bu Mukalenge wa bònsò; (Huh!)
NuMwaseci bu Mukalenge wa bònsò.

¹⁹⁴ Ncya bushuwa. Kweyemenyi cyùdi wèwè wela meeji, cidì muntu kampanda mukwabo wela meeji to. Ku diitabuuja itaba mulayi wa Nzambi. Udi muswe kucyenza anyi? Mpindyewu kî mbya ne muntu kampanda mukwabo mmucyènzè, anyi kî mmucyènze to, kadi wèwè udi wamba bishi? Newènzè cinyi ne Yesu ewu udibo babiikila ne n'Kilisto, udi uDimanyisha mu dituku edi ewu, mushindu umweumwe wakenzaYe mu dituku adi awu? Nudi baMwitabuuje anyi? [Disangisha didi dyamba ne: "Amen."—Muf.]

Tusambilaayi.

¹⁹⁵ Mukalenge Yesu, Mfumu wa bamfumu, Mukalenge wa bakalenge, Nzambi wa banzambi, Nzambi wa balombodi bònsò baa makookeshi maalabale; Wa kumpala, Wa ndekeelu; Alpha, Omega; Cibangidilu ne Nshiikidilu; Mutoto udi Ubalakana wa mu Dinda, Rose wa Shalona, Mbata wa mu Cibanda, Muji ne Mutoloku wa Davidi; Iwàku's, Mukalenge Nzambi, umwèumwè awu makeelela, leelu, too ne kashidi!

¹⁹⁶ Beneshaku musùmbà wa bantu ewu, Mukalenge. Eci nunku. . . [Katupa kaa mukaba wa mèyi munda mutupu—Muf.] cikaadi pabwîpi ne kubanga maalaba. Twenji kaadisangisha kakese mwaba ewu, ne Wèwè nyawu watubeneshimu. Wèwè waDimanyishi kutudi. Ndi ndomba, Nzambi, bwa Wèwè kutungunuka ne kuDimanyisha kutudi. Tùbènèshèku diloolo edi. Tùkwàcìshèku mpindyewu. Tudi beena lukengelu lwa bintu.

¹⁹⁷ Nenu, Mukalenge, Wèwè's udi mumanye ne ncitu muswe kutandisha bantu to, kadi mmunyi mùndi mwa kupuwisha kapya kaa cijila kàdi kàlàkuka aku? Ncitu muswe kwenza nanku to, Mukalenge. Wèwè udi mumanye nsòmbelu wanyi, mwoyi wanyi. Ndi ne cya kucyenza. Ne ndi ndomba, Nzambi, bwa Wèwè kunkwacisha bwa kucyenza. Mpèèshèku anu ngàsà cyanaana, ne kundekediku ngeeyemena dyumvwa dyanyi mèmè mwine to, kadi enzaku bwa ngeeyemene mulayi Webe. Mu Dìna dya Yesu. Amen.

¹⁹⁸ Ndi muswe bwa nwènù, muntu ne muntu, nwikalèku mu kaneemu kaa menemene anu bwa ndambu wa tusunsa cyanaana. Mu musùmbà wa bantu ewu, nyewu kudi balume ne bakaji basòmbè mwaba ewu, kakuyi mpatà to, biikàle bàsaama. Mbanganyi bàdi bàsaama ne beena lutatu muneemu emu? ela cyanza cyebe muulu. Amba anu ne: “Ndi dijinga ne Nzambi.” Ela anu cyanza cyebe muulu mpindyewu mene ne: “Ndi dijinga ne Nzambi.”

¹⁹⁹ Mpindyewu, ncyèna mumanye bantu bààbúngi menemene to. Ndi mumanye bàna baa balume basatu bàdi basòmbè apa mene aba. Ndi mumanye Mukalenge Dauch ne mukajende bàdi basòmbè pàapa bàba. Ngeela meeji, ngeela meeji ne ewu m'Mwaneetu wa bakaji Moore. Ncyèna mutwishiiibwe to. Ncyà bushuwa anyi, Mwaneetu wa bakaji Moore? Pa kuumusha bòbò abu, ngeela meeji ne bwalu abu mbutuuke, bwa Mwaneetu Mike ne pa cibumba cya ku cyambilu apa. Aci, bwa ku dyanyi dimona, ki bàndi mumanye mbòbò abu.

²⁰⁰ Kadi Taatù wa mu Dyulu Wàkalaya awu, ne mu dituku edi Yèyè uvwa mwa kuDishindika Yèyè mwine mu cikondo eci, menemene anu mwakenzaYe ku Sodoma. Yèyè ngwàcacilaya anyi? [Disangisha didi dyamba ne: “Amen.”—Muf.] ÚDimwènesha Yèyè mwine! Nudi nwitabuuja aci anyi? [“Amen.”]

²⁰¹ Mpindyewu wèwè muswe kusambila, ne ku diitabuuja! Mpindyewu kuteeci to bwa kulukakaja lungenyi ne: “Mmunyi mùndi mwa kuMulenga bu Mwakwidi Munene?”

²⁰² Mpindyewu, Bible mmwambe, mu Dipungila Dipyadiya ne: “Yèyè udi Mwakwidi Munene mpindyewu mene. Yèyè udi utungunuka ne kwikala Mwakwidi Munene wa mu mulongo wa Melekisedeke. Yèyè udi Mwakwidi Munene bwa kashidi. Kakwena Mwakwidi Munene mukwabo to pa kuumusha Yèyè.

Kakwena mutwangaji mukwabo pankaci paa Nzambi ne bantu to, pa kuumusha Muntu awu Kilisto.” Ncya bushuwa. Yêyè ki Umwepele, ne Ûdi umwèumwè awu makeelela, leelu, too ne kashidi.

²⁰³ Mpindyewu pìikalàbi ne Yêyè uci di anu Mwakwidi Munene umwèumwè awu, kadi Bible pende mmwambe ne: “Tudi mwa kuMulenga ku dyumvwa dya mateketa etu,” bu mwakenza mukaji mutekete wâkalenga civwalu Cyende awu, diitabuuja dyebe didi mwa kuMulenga diloolo edi ne Yêyè neñzè mushindu umweumwe awu, mu mubidi wa buntu, bu mwakenzaYe pavwaYe mu mubidi wa buntu kwaka ku—ku mucu wa nsanga wa Abraham. Nudi nwitabuuja aci anyi? [Disangisha didi dyamba ne: “Amen.”—Muf.] Yêyè ngwâkalaya ne Ûvwa mwa kuçyenza. Mpindyewu sambilaayi anu cyanaana, muntu yônsò udi ne dijinga awu. Nenku mêmè—mêmè. . .

²⁰⁴ Cidi anu mûmvwà mwambe ne, dipà kî ncintu kampanda cyenze bu mùdì wangata keele, ne wêwè muswe kukosa naaku *cikampanda*, udi mwa kucikosa, anyi kukosa *cikansanga*, udi mwa kucikosa, anyi cyônso cyûdì muswe kwenza to. Aci kî ndipà dya Nzambi to. Nwamonu anyi? To.

²⁰⁵ Dipà dya Nzambi mmushindu kampanda wûdì wêwè naawu wa kudyumusha mu njila. Ne mapà ne mabiikila ndidyànjila-kulongolola dya Nzambi. “Mapà ne mabiikila bitu mene kabiyi bya dinyigaleela to.” Udi ulediibwa naabi. Kakombo kakese kaa bîteshî kaudi udikokela wêwè mwine ubweja, kadi kuyi mwa kudyata pa dikàsà to. Nwamonu anyi? Nzambi ngudi ne cya kukwata naaci mudimu. Bikengela bwa wêwè ùdyùmùshè mu njila.

²⁰⁶ Diitabuuja dyebe wêwè ki didi mwa kukwata mudimu, kî ndyanyi mêmè to; dyebe wêwè. Dyanyi mêmè didi dicyumusha anu mu njila cyanaana. Itabuuja wêwè ne mwoyi webe wônsò ne Yesu Kilisto udi ne mwoyi leelu ewu.

²⁰⁷ Kwikadi mweyemene dyumvwa dyebe wêwè mwine to, wamba ne: “Ee, mpindyewu tangila, mêmè—mêmè nyewu ndi mu mushindu wa bwalu bukole, mwaneetu. Wêwè kwèna mummanyè to. Ntu anu mu dikalu dya balema edi. Ndi. . .”

²⁰⁸ Cyûtù aci nansha ciikàle cinganyi, kadi tangila umone Nzambi ní kaakutuuluka bwa kwenza anu menemene mwakenzaYe pavwaYe pa buloba apa mu mubidi wa musunya ewu. Yêyè neàcyènzè mu mubidi webe wêwè awu, mu mubidi wanyi mêmè ewu, twêtù bônsò badyènzè cimuku biikàle tuMwitabuuja. Yêyè neàcyènzè bwalu Yêyè ngwâkalaya ne Neàcyènzè.

²⁰⁹ Mpindyewu kweyemenyi cìdì muntu kampanda wamba ne: “Kaa, aci’s—aci’s ndubuku” to, mudibo baCibiikila amu. S’baakamba Yesu ne ùvwa cintu cimwecimwe aci. Baakamba ne Yêyè uvwa mwena lubuku, “démon.” Kadi Yêyè uvwa Mwànà wa

Nzambi, bwalu Yèyè uvwa ukumbanangana ne Dìyì dilaya dya Nzambi.

²¹⁰ Mpindyewu, bu mûngămbì, myaba yetu—yetu, kabyena bikengela bwa twètù kwikala ne cyòci aci to, bwa kulwa kutentekela bantu byanza. Twabatentekedi byanza makeelela diloolo. Kadi cintu cimwepele cidì cikèngelà bwa wèwè kwikala naaci ndiitabuuja, ne pashiishe kujingulula. Ku diitabuuja udi uciitaba, ku diitabuuja. Kî—kî nku cinganyi cyònsò cidì. . .

Kwambi ne: “Ee, mpindyewu cidì mwa kwenzeka bishi?” to.

²¹¹ Bu mêmè mwa kukwambila mushindu wùvwàci cyenzeka, dîbà adi kî ncifwanyine kabidi kwikala diitabuuja to. Ncyèna mumanye mùdìci cyenzeka to. Ncyèna mumanye to, kadi ndi nciitabuuja. Ncyèna—ncyèna mumanye mùdì—mùdì Nzambi usungila ngènzàmpèkààtù to, kadi Yèyè’s udi ucyenza. Ncyèna mumanye mùdì Nzambi wenza cyònsò cya ku bintu ebi to, kadi ndi nciitaba. Yèyè, Yèyè udi ucyenza, ne ki mushindu ngwòwò awu. Bwalu, ncyèna mwa kucyumvwija to. Mpindyewu, ee, mêmè. . . Kacyadyakuumvwijiibwaku to. Muntu nansha umwe kèna mwa kucyumvwija to. Bwalu, wèwè mucyũmwije, dîbà adi kacicyena kabidi diitabuuja to.

²¹² Ncyèna ngumvwa mùvwà Nzambi ne Kilisto bafwanyine kwikala Mupersona umwe to, kadi’s ki civwàBo. Mifundu’s nyidì myambe nanku. Ee, kwèna mwa kucyumvwijaku to, kadi, s’ki civwàBo. “Taàtù Wanyi udi munda Mwanyi. Kî m’Mêmè udi wenza byenzedi to; n’Taàtù Wanyi munda Mwanyi. Mêmè nciyi ngenza byenzedi Byende to, dîbà aci cidì cileeya ne Ncyèna wa kudiYe to. Kadi Mêmè ngenza byenzedi Byende, dîbà adi Yèyè udi ufila Yèyè mwine bujaadiki ne Ndi wa kudiYe.”

²¹³ Ee, ncintu cimwecimwe aci mpindyewu, cintu anu cimwecimwe aci menemene. Yèyè udi umwèumwè awu makeelela, leelu, too ne kashidi, bu nwènù mwa kwitabuuja.

²¹⁴ Mpindyewu kudi muntu musòmbè mwab’ewu mene kumpala kwanyi, ùdi ne nsuki mifiike. Ùdi ne dîbà ku diboko; ne nkooci mufiike. Mmwase binete. Bu nwènù mwa kutangila anu apa mene, nudi numumona musòmbè mubwite kwîsù, ùsambila. Mêmè nciitu mumanye muntu wawa to. Taàtù wa mu Dyulu mmumanye ne ncyèna mumumanye to. Kadi ndi muswe anu kumutwishila mèsù bwa katanci kakese cyanaana, bwalu ùdi umweka bu udi ne meeji matooke a menemene, musòmbè mwaba wawa. Kacya anu nteela bwalu abu, muntu awu ùmba ubwita kwîsù ne ùbanga kusambila. Muntu awu mmwenyi kùndì, mbwena kwamba ne, byanza byanyi mbyòbì ebi. Ncyèna mumumanye to. Nzambi ngudì mumanye muntu wawa, ne Yèyè ngudi mwa kunsokolwela. Mulayi awu wòwò mulelela mu Bible, Yèyè udi mwa kunsokolwela cidì muntu wawa mubwicile kwîsù ne nciyi, ne ciine cidieye usambidila aci. Nudi nwiitabuuja aci anyi? [Disangisha didi dyamba ne: “Amen.”—Muf.]

215 Udi uciitabuuja anyi, mukalenge? Bu wêwè mwa kutabala, wêwè udi musòmbe mwaba ewu awu, tangilabi kuneeku. Udi witabuuja cyôci aci anyi? Eyo. Mpindyewu udi mumanye ne ncyèna mukumanye to. Katwena bamanyangane to. Kadi Nzambi mmukumanye. Mpindyewu nyèyè awu wâshi mwadi, ùkaadi ùdila. Bwalu, mêmè ndi mwa kumwambila mpindyewu ne Nzambi neandamune ku dilomba dyende, nwamonu's, bwalu cyôci aci ki cidi cimulenge anu pa dîbà adi, Bukênkè abu; byùmùkù ku mîdimà, byashintuluku byayi ku Bukênkè. Nwamonu anyi?

216 Mpindyewu, muntu ewu, ùdi ùsambidila muntu wa cyanaana, ne mwine awu mmwânà mukese wa balume udi musòmbe ku luseke lwende eku ewu. Mmwanende mulela. Ncya bushuwa. Mpindyewu, mwânà mukese wa balume awu ùdi ùsaama disaamà dya—dya cifu, ne cintu cikiwabo kabidi cimutacisha mu mala. Ncya bushuwa. Ncya bushuwa.

217 Kî mbaa muneemu to. Kanwena baa mu Arizona to. Nudi baa ku Californie. Cya bushuwa. Kabidi wêwè udi mwambi, ne udi cidimba cya Assemblées de Dieu. Aci ncilelela. Révérend McKeig ki dîná dyebe, anyi, Révérend Keig, ncya bushuwa. Aci ncilelela anyi? Nyungishabi byanza byebe mushindu ewu. Mpindyewu mwanebe mukese wa balume awu neasangale. Wamonu anyi? Diitabuuja dyebe's!

218 Cinyi mpindyewu? Mpindyewu muntu nyèyè wawa ne byanza byela muulu, kî mmummanyane to, mêmè ncyèna mumumanye to. Kadi civwa ncinyi? Mmulenge Mwakwidi Munene. Mpindyewu, nwamonu's, yèyè kavwa mwa kweyemena dyumvwa dyende yèyè mwine to. Mpindyewu cidi cikengela bwa yèyè kwenza, cidiye wenza ncinyi mpindyewu? Bidi bikengela bwa yèyè kwitabuuja cidiye mwambidibwe aci, bulelela abu, bwalu mmumanye ne kî mmummanyane mêmè to. Ncya bushuwa.

219 Mwab'ewu, muntu mukaji kampanda nyewu musòmbe mwab'ewu mene kumpala kwanyi eku, kabidi, ùdi ne mutu wende mwinyika. Ùdi ùsaama kansere. Ùdi pende wa ku Californie. Ndi ntekemena ne eci kacyna cimupita to. Mandemwazele Adams. Ki dîná dyende ndyôdi adi. Ncitu mwanji kumumonaku to kacya bandela. Eyowa, aci ncilelela.

220 Kudi inābànà kampanda udi musòmbe lwa paanyima *apa*. Ncyèna anu mwa kumutwa wanyi...kumufunkuna anu ne munu to, kadi ndi mmona Bukênkè bulebelelele kumutu kwende aku. Ùdi mu lutatu lwa menemene. Ùdi ne nshingu umusaama, aci ncintu cimwe. Nenku cintu cikiwabo, ùdi—ùdi ne ntatu ya—ya mu nyuma, ki cidi citamba kumusuuya. Kabidi ùdi ne lutatu lwa ku lubanza lwende; mwanende wa bakaji mmufume ku dinyeema. Ncya bushuwa. Aci's ncilelela, kî mmwômò anyi? Nyawu mwele cyanza muulu. Mandamu Miller. Aci ncya bushuwa. Udi witabuuja anyi? Nzambi neamwaluje, neondope

mubidi webe. Mpindyewu, ncitu mwanji kumumonaku to kacya bandela. Yèyè mmwenyi anu wetu wa menemene ewu.

²²¹ Inābànzà nyèyè ewu musòmbè mwab'ewu, mu bateeleji emu. Kí—kí ngwa muneemu to, ne yèyè pende ngwa ku Californie. Udi ne kansere, ne kansere aku kadi pa dibeele dyende apu. Bātu bamupande dibeele dimwepele, kadi nkaye ku dikwabo. Cya bushuwa. Mandemwazele Calvin. Ncya bushuwa. Udi witabuuja ne Nzambi neakusangaje anyi? Udi uciitabuuja. Mèmè ndi mwenyi kùdì, inābànzà. Ncyèna mukumanye to. Aci's ncilelela. Nwamonu anyi? Yèyè udi ne kansere.

Bwa nwènu kumanya ne Nzambi udi kaaba aka's!

²²² Inābànzà nyèyè wawa musòmbè anu ku luseke kwende menemene aku. Dìnà dyende m'Mandamu Harris. Mmwenyi kùndì anu wetu wa menemene ewu. Kadi dībà dìdì Nyuma mulenge mukaji ewu adi, yèyè wamuumvwidi luse. Ne yèyè mmufumine ku Californie. Ncya bushuwa. Ne ùdi ne dikaaya dimusaama. Ncya bushuwa. Udi witabuuja ne Nzambi neakwondope. Pìikalàci cya bushuwa, ela cyanza muulu bwa bantu bamone; mwenyi anu wetu wa menemene ewu.

²²³ Kwikadi mweyemene dyumvwa dyebe wèwè mwine to. Cìdì mwa kwenza ciine aci ncinyi? Kwèna mwa kucyumvwija to. Aci's ncidikà's. Ncintu cìdì kaciya dyumvwija. Konkaayi bantu abu; ncitu mwanji kubamonaku to kacya bandela, nciyiku mumanye kantu nansha kamwe pa bìdì bibàtàngilà to. Mbifwanyine mèmè kutungunuka anu kutungunuka mu disangisha dijima.

²²⁴ Kadi, mpindyewu tangila, kwikadi mweyemene dyumvwa dyebe wèwè mwine to. Kadi ikala mweyemene cidiYe mulaye, bwa ne Yèyè neenzè cyòci aci; aci cyòci kaciya Nyuma umwèumwè uwva musòmbèle mu mubidi wa buntu, wákamanya ne Sarah wakaseka mu ntenta, paanyima paa Muntu awu awu to. Ncya bushuwa anyi? Kabidi Yèyè wakalaya, kumpala menemene kwa buloba kubutudiibwabu ne kapyà, pìikalà Mwànà wa muntu mwa kuDibuulula cyakabidi mu mushindu umweumwe awu, bu—bu Mwànà wa muntu (mu ciprofeta) mwa kuDibuulula mu mubidi wa buntu bu mudiYe neetu kaaba aka diloolo edi, bu mwakenzaYe musangu awu. Mpindyewu mmu dībà kaayi mutùdi ne mwoyi emu? Anu pabwipi menemene ne kabutu.

²²⁵ Mulunda wanyi, kushaadi mwaba ewu kabidi, kacya anu watungunuka, mwikàle ngènzàmpèkààtù to. Itaba Yesu Kilisto paucidi mu Bwikadi Bwende apa. Mpindyewu, ndi mumanye ne, pa ciibidilu bitu ncilele bwa bambi bwa kwikala kusengeleelangana ne kulondelangana miyiiki, ya bìdì bitàngilà maamù ukàadi mufwe ne mumane kuya. Aci cidi anu cimpè. Kadi katwena tulwa biimanyine pa maamù wetu ukaadi mufwe awu to. Wanyi maamu's ukaadi pende mufwe; wanyi taatù pende. Kadi tudi tulwa, ne meeji ónsò, twitaba biimanyine pa ne Nzambi wakaDimwenesha mu Yesu Kilisto, bwa kuumusha

mpekaatu ya baa pa buloba. Tudi tulwa ne twitabuujya biimanyine pa Difuta dya cibawu. Nenku bu mudiYe mushindike Dîyi Dyende. . .

²²⁶ Ncyêna ncyuka ne nku ekeleeziya kaayi kûkaadi muye to, ku ba-Méthodistes, ba-Baptistes, beena Katolike, ba-Presbytériens, anyi nansha kuyi ne ekeleeziya mwine to. Bu wêwè mwa kwitaba ne umvu bwalu ebu mushindu mushiilangane, ne umanya ne kacya kûtukù mwanji kulediibwa cyakabidi to, kadi uswa bwa kulediibwa cyakabidi, ne uswa bwa kuciitaba mpindyewu, mulayi awu mpindyewu. Udi mufwanyine kupanga kuujiibwa mpindyewu, kadi neuujiibwe piikalà. . . bu mûcidi masangisha matungunuke. Pawikalà muswe kuciitaba mwimanyine pa bishimikidi abi, swaku ujuukile kuulu ne mêmè ndambule anu disambila pa kaaba keebe anu mwaba wûdi mwinyanyine awu. Muntu ne muntu yônsò munda emu udi mumanye ne. . .

²²⁷ Kwikadi mudyëyèmène wêwè mwine, ee, wamba ne: “Ndi mwakule mu myakulu,” to. Mpindyewu, aci kacylene ne bwalu bwa dyenza ne cyôci aci to. Ntu ngiitabuujya paanyi dyakula dya mu myakulu, mêmè ewu.

²²⁸ Kadi mêmè nkaadiku mumone baloji bakaji, badémone, ne bikwabo byônsò, baakula mu myakula ne bayandamuna. Ncya bushuwa. Konkaayi bampandanjila lwà kuntweku, tudi mwa kujandula’s, Mwaneetu Creech, wêwè’s udi mumanye ne aci ncyu bushuwa. Mêmè nkaadi mubamonemone baakula mu myakulu, kadi banwina mashi mu kabalubalu kaa mutu wa muntu, basoka dyabulu. Bushuwa. Nkaadi mubamone bateeka crayon panshi, kadi ûjuuka wimana ne ûfunda mu myakulu myenyi, nenku muloji mukaji, anyi, muloji mulume ujuuka mwaba awu, ucyandamuna.

²²⁹ Pa nanku dyakula dya mu myakulu kadyenaku cimanyinu cya ne udi mupete Nyuma Mwîmpè to. Biikalà nanku, kadi pawikalà wakula mu myakulu kadi uvila Dîyi edi, s’kudi cintu cipampalamuke mwaba kampanda. Cya bushuwa, uh-huh, cya bushuwa. Kwikadi mweyemene dyumvwa dyebe wêwè mwine to.

²³⁰ Muntu kampanda mpindyewu, wêwè udi wamba ne: “Ee, mêmè nkaadi mucyêlèle mbila.” Mêmè paanyi’s ntu nyeela. Kadi kwikadi mweyemene aci to.

²³¹ Mêmè nkaadi mumonemone makole a badémone a mishindu yônsò ela mbila ne mikunda. Nkaadiku mumonemone baaMuzulumanyi beela mbila ne mikunda mushindu wa ne, basaluka mu mushindu wa bafika ne ku diditubula byanza ne misongolu. Mu Inde, nkaadiku mubamone beela mikunda ne batupika baya muulu ne panshi, bangata mabungu a mâyi, bapayikemu ndobo, ne badibwejayi mu dikoba ne bendela pa makala a mudilu, cya bushuwa, bavila Yesu Kilisto.

²³² Nwamonu’s, kwikadi mweyemene dyumvwa dyebe wêwè mwine to, kadi eyemena Dîyi dya Nzambi. Nsômbelu webe,

pìikalàye kayi ukumbanangana ne Bible to, bwa kwitabuuja Diyì dyònsò didi mwômò amu adi; kadi peebe muswe kuciitabuuja, ne muswe bwa Nzambi akumbajile diswa Dyende kùdi wèwè, bwalu udi mwa kwikala citupa cya Nzambi, swaku ujuukile kuulu wámbe ne: “Ndi muswe kuciitabuuja anu mpindyewu mene, mwaneetu.” Twasakidila. Twasakidila. Nzambi akubeneshe. Nzambi akubeneshe. Nzambi akubeneshe. Nzambi akubeneshe. Nzambi akubeneshe. Bilenga be. Nzambi akubeneshe. Nzambi ànwènzèlèku cyòci aci, bònsò badi ne meeji matooke aba. Amba ne. . . Ikalaayi anu—anu batungunuke ne kwimanyina kuulu, anu. . .

233 Wèwè udi wamba ne: “Mèmè ndi cidimba cya ekeleeziya, Mwaneetu Branham, kadi mu bushuwa bwa bwalu ndi mwena Mpenta; kadi pakaadibi bulelela bikafika bwa kwamba menemene ne ndi bulelela mwa kwitabuuja ne Diyì dyònsò adi didi Bulelela, ncyèna anu mwa kucyenza to, kadi ndi—ndi muswe kucyenza. Ngambùlwishèku, nsambidìlèku. Ndi muswe kujuuka kwamba ne: ‘Ndi—ndi. . .’” Udi wamba ne: “Ee, tangila, pândi musòmbe kaaba aka apa, anyi nkaadi mufile bujaajiki mu ekeleeziya ewu ne, ki címvwà.” Kadi udi mumanye ne, munda mwa mwoyi webe amu, kî ncyûdi to. Nansha Nzambi mmumanye anu pende ne, kî ncyûdi to, wamonu’s, pa nanku mbwa cinyi kubenga kujuukila kuulu? Kwikadi mweyemene dyumvwa dyebe wèwè mwine to, kadi ikala mweyemene Diyì Dyende.

234 Nudiku mwa kujuukila kuulu anyi, nwènù bakwabo? Kudiku mukwabo udi muswe kujuuka kuulu anyi? Nzambi akubeneshe. Nzambi akubeneshe. Nzambi akubeneshe, wèwè. “Nzambi, ngambùlwishèku.” Nzambi anubeneshe bònsò. Abi’s mbîmpè. Tungunukaayi anu ne kujuukila kuulu.

235 Udi wamba ne: “Aci necìikalè ne dikwacisha kùndi anyi?” Anji juukila wèwè anu kuulu musangu umwepele, kadi umone ne bidi ne dikwacisha. Ambila anumu ne: “Ndi muswe, Mwaneetu Branham, ndi muswe ngiikalè bîmpè. Ndi muswe ngiikalè bîmpè.”

236 Mpindyewu, ncyèna ngamba ne umuke mu ekeleeziya webe to. To, mukalenge. Shaala wèwè anu mwaba wùdi awu, ikàla anu muntu mulelela mùle tente ne Nyuma Mwîmpè mu ekeleeziya awu. Udi wamba ne: “Ee, ncyèna mumanye ne mpaasata wanyi neámbe cinyi to.” Yèyè’s neakwanyishe pawikalà nanku awu, pìikalàye mulume wa Nzambi. S’ncyà bushuwa.

237 “Bukênkè bwenu bukenkeshe bikole kumpala kwa bantu bwa bamoneku byenzedi byenu bîmpè ne batumbishe Taatù wabo.”

238 Nzambi akubeneshe. Ee, Nzambi anubeneshe nwènù bònsò babidi, ne wèwè; ne wèwè, mwaneetu wa balume, wèwè. Nzambi

anubeneshe, muntu ne muntu. Nzambi akubeneshe. Nzambi akubeneshe wêwè udi apa ewu.

²³⁹ Mpindyewu nwênù bàdì bajuukile kuulu abu, panwikalà badyũmwè bîmpè menemene paanyima paa dijuuka adi, elaayi anu byanza muulu bwa kwambila bakwabo ne nudi badyũmwè bîmpè menemene pa bwalu abu paanyima paa dijuukila kuulu. Nwamonu's, cyanza ne cyanza cyônsò. Bushuwa, ki munudi badyũmwè. Nwamonu's, nudi ne meeji matooke. Wêwè udi mwimanyine kuulu awu, amba ne: "Nêngìikalè mujaadiki."

²⁴⁰ "Ewu wângata kaaba Kaanyi panwapa awu, Mêmè nêngàngatè kaaba kende Kwaka. Ewu udi uMfwa bundu panwapa kumpala kwa bantu aba awu, Mêmè nêmmufwè bundu kumpala kwa Taatù Wanyi ne Banjelo baa cijila." KuMufu bundu to. Kwikadi mweyemene dilukakaja dyebe wêwè mwine dya lungenyi to. Ikala mweyemene Dìyì dya Nzambi. "Ewu wânjikula Mêmè kumpala kwa bantu awu, Mêmè nêmmujikùlè kumpala kwa Taatù Wanyi ne Banjelo baa cijila."

²⁴¹ Nekwikalèku bakwabo anyi, kumpala kwa twètù kusambila? Twinyikaayaaku mitu yetu. Nzambi akubeneshe, mwaneetu wa bakaji. Cya bushuwa. Nzambi akubeneshe, ne wêwè, mwaneetu wa balume. Cya bushuwa. Nkufwanyineku kwikala mukwabo anyi, anu patucidi ne mitu yetu miinyika apa? Nzambi akubeneshe, wêwè. Mpindyewu, aci ncyá bushuwa, nudici anu nutungunuka ne kjuukila kuulu. Netwikalè anu banji kwindila katanci, anu katanci kakese cyanaana. Nzambi akubeneshe, mwaneetu wa balume. Nzambi akubeneshe. Wêwè udi wamba ne: "Bidi ne cidìbi byumvwija anyi, bwa kwamba ne: 'Nzambi akubeneshe?'" Aci's ndyamba dya mabeneshá aanyi kunudi. Nzambi anubeneshe.

²⁴² Bamwe baa kunudi bàdì biimane balonde cimanu abu, kunudi kanuyi ne mwaba wa disòmba aku, nudiku mwa kwela anu cyanza muulu cyanaana, kwamba ne: "Mêmè, Nzambi, mmêmè" anyi? Nzambi akubeneshe, mwaneetu wa balume. Nzambi akubeneshe, ne wêwè; ne wêwè, mwaneetu wa bakaji; ne wêwè, mwaneetu wa balume; ne wêwè, mwaneetu wanyi wa bakaji.

²⁴³ Kaa, Nyuma Mwîmpè nyawu wendakana ne kalolo kònsò kumutu kwa bateeleji. Nudiku mwa kuumvwa Cyôci aci anyi? Nzambi akubeneshe, wêwè nsongaalume udi apa pa cibumba cya ku cyambilu ewu. Nzambi akubeneshe, lwà mu ditumba mwamwa. Nzambi akubeneshe, nsongaalume. Eyowa.

²⁴⁴ Éyì Nyuma Mwîmpè, bwelaku cyakabidi mu myoyi yetu mpindyewu. Tuleejeku bilema byetu, Mukalenge. Katwena... Katwakweyemenaku dyumvwa dyetu twètù biine, dilukakaja dya ngenyi dyetu twètù biine to. Kadi tudi tuKweyemena Wêwè, bwalu tudi bamanye ne tudi biimane mu mulayi Webe wa Nzambi, mushindika wa leelu. Wêwè waDimanyishi bipite,

bipite ne pa dilukakaja dya lungenyi kana dyônsò. Katwena bafwanyine kulukakaja lungenyi anyi kucyumvwiya to. Kadi Wêwè nyawu watuuluku buludi kaaba aka munkaci mwetu mpindyewu, ne watumanyishi ne Wêwè udi kaaba aka, ne balume ne bakaji badi biitabuuja cyôci aci ne baciitaba.

²⁴⁵ Nzambi, bwejaku umwe ne umwe wabo mu cyâdi Cyebe, nenku ubasokoke mu Lubwebwe lwa Bikondo too ne piikalà tupya mwa kupita. Nyewu tukaadi pabwîpi ne kwoshiibwa, Mukalenge. Tudi bacimanye. Tukaadi baalukile mu Sodoma. “Kadi baakane kabaakubutudiibwa pamwe ne bapiile nansha.” Wêwè neubiikile bâna Beebe, Mukalenge. Wêwè wâkambila Lota ne: “Patuka muntwamu. Patuka.” Nyewu ndomba, Nzambi, bwa ne ewu yônsò udi mu ngiikadilu awu diloolo edi, udi muntwamu, udi kayi mutwishiiibwe bwa mwaba udiye mwimanyine. . .

²⁴⁶ Nzambi, kî mbafwanyine kunaya ne mudilu pa kwenda kulonda müsêsù wa bafwanyine kakumakana ne mashinyi àdi èndlà mu njila wa luseke anu lumwe to, luseke lubi alu. Kî mbafwanyine kunaya ne mudilu pa kupita midilu mikunze, piikalàbo ne lungenyi lwabo mu lwôlò nansha, bwalu mbafwanyine kushiibwa. Dîbà adi mmunyi mùdi muntu mufwanyine kunaya ne mudilu pa bìdi bitàngilà kwende kuyaayaye kwa Cyendelele, mwikàle anu ùbùka, ùdicinkila, ùdyèla mu bwalu bwa njiwu kayi ne dyanyisha dilelela to, ne anu bwalu mmwena ekeleeziya anyi dingumba kampanda? Ne mu bulelela yèyè kêna—kêna mwa kuumvwaku mùdi Dîyi dya Nzambi difwanyine kwikala lelu mùvwàDi mwine musangu awu to, mùdi milayi eyi mifwanyine kumweneshiiibwa, mùdi cikondo cya bapostolo cimane kuya. Bàkwàcishèku, Taatù. Nyewu ndi mbalambula kùdi Wêwè mu Dîna dya Yesu Kilisto. Amen.

²⁴⁷ Twasakidila, mwaneetu wanyi wa balume, mwaneetu wanyi wa bakaji. Ndi ne disanka dyàbûngì bwa kunubiikila ne mwaneetu wanyi wa balume, mwaneetu wanyi wa bakaji.

²⁴⁸ Vulukaayi ne, Nzambi neandumbulwishe bwa dîyi ne dîyi dyônsò, ku Dituku dya Cilumbulwidi. Byônsò bìngàayiishì diloolo edi ebi, bikengela ndumbulwishiiibwe bwa byòbì abi. Ndi mumanye aci. Ne byônsò bìndì mwenze kacya pâncivwà mwànà mukese, muyiishe Evanjeeliyo ewu, kadi pashiishe kwikala mwimanshiibwe anyi?

²⁴⁹ Mpindyewu mbanganyi baa kunudi aku bàdi bàsaamà ne biikàle mu ntatu, kaaba aka diloolo edi, ne bakeba bwa kubasambidila? Ela cyanza muulu. Mpindyewu nudiku mwa kungenzela cikwabo cintu anyi? Tentekelanganaayi byanza muntu ne mukwende. Tentekelanganaayi byanza muntu ne mukwende. Muntu ne muntu inyike mutu mpindyewu, ne anu munuvwa mu ekeleeziya amu, pa cibumba cya ku cyambilu apa.

250 Nzambi munanga, mu Dîná dya Yesu Kilisto, ne dya Bwikadi Bwende, Bwikadi bushindika's! Díyi diine didi diyiiishiibwe adi, dyáshindikiibu ne Wêwè udi umwèumwè awu makeelela, leelu, too ne kashidi. Nyuma Mwîmpè wa Nzambi apwekeku ne kavumu pamutu paa musumbà wa bantu ewu mpindyewu mene. Bààbûngì baa kudibo mbalwe ne baKwitabe bu Musungidi wabo, batù baa cìmpìngà bààbûngì baaKwitabi ne bàlùkìdì. Éyi Nzambi, ndi ndomba mu Dîná dya Yesu Kilisto ne, Wêwè wondopeku muntu ne muntu. Wêwè wákamba ne: “Bimanyinu ebi nebifile bàdì bìitabuujà; bôbò batentekele babeedi byanza, babeedi nebasangale.” Wêwè ngwákacilaya, Mukalenge, ne bânà beena kwitabuuja nyewu batentekelangane byanza muntu ne mukwende.

251 Wêwè Sataana, udi mucimunyiibwe. Patuka munda mwa bantu aba, mu Dîná dya Yesu Kilisto. Lekela bantu abu baye, bwa bwalu bwa Bukalenge bwa Nzambi, mu Dîná dya Yesu. Amen.

252 Bônso bàdì bìitabuujà mpindyewu ne Yesu Kilisto m'Mwondopi wabo, kabidi bu Musungidi wabo, ne biikàle baswe kuMwitabila pa bishimikidi bimwebimwe abi abu, juukilaayi kuulu, nwâmbè ne: “Ndi mpindyewu ngiitabuuja Yesu bu Mwondopi wanyi, kabidi bu Musungidi wanyi.” Bilenga be! Mukalenge atumbe's we! Twasakidila kùdì Mukalenge! Mpindyewu twèlààyi byanza byetu muulu bwa tuMwimbile musambu.

NêmMutùmbishè, nêmMutùmbishè,
Tumbishaayi Mwânà wa mukooko
wákashipiibwa bwa bangènzâmpèkàâtù;
Mupeeshaayi butumbi, nwênù bantu bônso,
Bwalu Mashi Ende mmasukùle dikeji dyônso.

253 Kaa, kanwenaayiku nudyumvwa bilenga anyi? Nyungishaayi byanza byenu. Kaa, ekelekele! Tùwîmbààyikù cyakabidi tǔng.

NêmMutùmbishè, nêmMutùmbishè,
Tumbishaayi Mwânà wa mukooko bwa...
(Vulukaayi ne, “umwèumwè awu makeelela,
leelu, too ne kashidi,” ki cidì Mwânà wa
mukooko awu.)
Mupeeshaayi butumbi, nwênù bantu bônso,
Bwalu Mashi Ende mmasukùle dikeji dyônso.

254 Nudi banange aci anyi? [Disangisha didi dyela lubilla ne: “Aleluuyah!”—Muf.] Amen. Twololaayi cyanza tulabule muntu kampanda ku cyanza. Edi disangisha ki dikangula dya cyalu, bwa kubanga mpungilu. Ambaayi ne: “Nzambi akubeneshe, mwaneetu, mwena lwendu. Nzambi akubeneshe” Abi's mbilenga. Abi's mbîmpè. Bilenga be! Mpindyewu nudiku nwitabuuja ne netwikalè mwa kwenza mpungilu munene paanyima paa cyôci eci anyi? [“Amen.”] Tudi twela Nzambi

twasakidila bwa disangisha dinene, mpindyewu netwikalè mwa kwenza mpungilu munene. Bònsò bàdi bàciitabuujà, ambaayi ne: “Amen.” [“Amen.”]

Diitabuuja dyanyi nditangile Kùdì,
 Wèwè Mwànà wa mukooko (Tutangilaayi
 kudiYe mpindyewu.) wa ku Kalvariyo,
 Éyì Musungidi wa kùdì Nzambi;
 Mpindyewu ngumvwilèku pândi nsambila apa,
 Umushaku mpekaatu wanyi yònsò,
 Kaa, anyishaku bwa kubangila ku leelu ewu
 Mémè yònsò ngiikalè anu Webe!
 Pâncidì ngendela mu nyongolo wa mîdimà wa
 njila mibwelakane wa panwapa apa,
 Ne pàdì ntatu yipaasalala yinnyungulukila
 apa,
 Wèwè ikalaku Mulombodi wanyi;
 Tuminaku mîdimà dîyi bwa yandamuke
 muunya,
 Kupulaku bwôwà bwa tuninganyinga,
 Kaa, anyishaku bwa kubangila ku leelu ewu
 Mémè yònsò ngiikalè anu Webe!

²⁵⁵ Amen! Disangisha dyâmbì ne: “Amen.” [Disangisha didi dyamba ne: “Amen.”—Muf.] Aleluuyah!

Kaa, nêMutùmbishè,
 Tumbishaayi Mwànà wa mukooko
 wâkashiipiibwa bwa bangènzàmpèkààtù;
 Mupeeshaayi butumbi, nwênù bantu bònsò,
 Bwalu Mashì Ende mmasukùle dikeji dyònsò.

Bilenga kaayipu's we!

²⁵⁶ Eyo, twinyikaayaaku mitu yetu mpindyewu bwa dibenesha. Ncyèna mumanye ne udibo basungule bwa kucyenza nganyi to. Mwaneetu Johnny Manadal, wa ku Californie, patucidi ne mitu yetu miinyika apa. Mpindyewu kanwikadi's nwâlwa kupwa mwoyi maalaba diloolo, aci nciikalàku dyambedi, ntwadijilu. Maalaba diloolo, mpungilu neikalè apa mene, apa mene mu cibambalu cineene eci, pa dîbà mwandamutekete ne tusunsa makumi asatu.

²⁵⁷ Nzambi anubeneshe. Bwikadi bwa Nzambi bwânùsànkishi anyi? [Disangisha didi dyamba ne: “Amen.”—Muf.] Amen. Mpindyewu twinyikaayaaku mitu yetu pàdì Mwaneetu Johnny ututangalaja apa.



KWIKADI MWEYÈMÈNE DYUMVWA DYÈBÈ WÈWÈ MWINÈ TO LUA65-0120
(Lean Not Unto Thy Own Understanding)

Diyiisha edi dya Mwaneetu William Marrion Branham, dyakayiishiibwa bwa musangu wa kumpala mu Anglais mu diisâtù diloolo, mu matuku 20 a ngondo wa kumpala, cidimu cya 1965, bwa mpungilu wa Bwobumwe bwa Buloba bujima bwa Beena Kantu-ku-byanza baa Evanjeeliyo mu Kaabujima ku Ramada Inn mu Phoenix, Arizona, U.S.A. Ndyumusha pa mukaba wa mêyî ne dituuta ku cyamu mu kaabujima kâàdî mu Anglais. Nkudimwinu wa mu Ciluba ewu mmutuuta ku cyamu ne mwabanya kùdî Voice Of God Recordings.

CILUBA

©2019 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org